

金文雅

和16  
343  
/





利  
296  
1



金匱要略

明治廿年三月廿三日 鉄洵 贈



光緒辛丑七月  
江蘇書局重刊

金初無文字也自太祖得遼人韓昉而言始文太宗入宋汴州取  
經籍圖書宋宇文虛中張斛蔡松年高士談輩後先歸之而文字  
熠興然猶借才異代也至蔡珪傳其父松年家學遂開金代文章  
正宗洎大定明昌之間趙秉文楊雲翼主文盟時則有若梁襄陳  
規許古之勁直党懷英王庭筠之文采王若虛王渥之博洽雷淵  
李純甫之豪俊爲金文之極盛及其亡也則有元好問以宏衍博  
大之才足以上繼唐宋而下開元明與李俊民麻革之徒爲之後  
勁迹其文章雄渾挺拔或軼南宋諸家乃好問編中州集詩同時  
有馮清甫亦輯金文至百餘卷惜竟不傳其專集之幸存者惟拙  
軒滏水淳南遺老莊靖遺山五者而已今廣蒐嚴遴汰其羸率取  
其雅馴釐爲十六卷附以作者考略名曰金文雅聊存一代之文  
獻云爾

道光二十一年夏六月秀水莊仲方序



Table with 12 vertical columns and multiple rows, containing faint bleed-through text from the reverse side of the page.

采取書目

拙軒集	滏水集	淳南遺老集	遺山集	莊靖集	大金集禮	中州集	大金國志	松漠紀聞	歸潛志	金史	元文類	玉堂嘉話
-----	-----	-------	-----	-----	------	-----	------	------	-----	----	-----	------



高麗史  
薊州集  
安陽金石錄  
河南通志  
沂州志  
泰安府志  
平陽府志  
棲霞縣志  
山左金石志  
祖庭廣記  
式古堂書畫彙考  
欽定全金詩

金文雅體例

一金集傳者五家餘皆采自他書今除五集外各注采書于目下  
其有本集不收從他書選入者亦注明  
一金文雖無南宋冗長萎弱之習閒傷麤率茲選其雅馴者至青  
詞及爲釋道二家作概不錄入已十汰其七八矣  
一作者名氏爵里及其行事各述大略以備知人論世之鑒  
一字文虛中吳激張斛高士談皆宋臣而仕于金則錄之劉祁揚  
宏道揚奐王鶚皆金臣而仕于元則刪之如李俊民元好問杜  
仁傑雖入金而獨能完節故應錄入以遂其志  
一欽定全金詩搜輯無遺今約選五七言古詩各一卷近體從  
文粹之例不采



金文雅作者考

秀水莊仲方述

完顏勛字勉道本名烏野穆宗第五子官至左丞相太保領行臺三省事封漢國王勉道剛正好學以金初未有文奉敕撰祖宗實錄又預平宗磐之難材兼文武大定中詔以詩文鏤板今已不傳

完顏宗幹本名幹本太祖庶長子佐太祖太宗平遼官至太師封梁宋國王有金議禮制度正官名定服色興學選士治歷明時皆宗幹于天會初啟之

完顏宗憲本名阿懶幼入太學官至右丞相太子太師宗憲十六入學即為太宗所器從其兄宗翰克宋汴京眾人爭取財物獨載圖書以歸世宗朝多所建白信任特專人稱宗室賢相

紇石烈良弼本名婁室回怕川人天會中以女直字學生入選年十四為北京教授官至右丞相卒封金源郡王諡誠敏良弼聰



明正直知人善斷起寒素爲冢宰二十年佐世宗成太平之功  
時稱良相大定十五年圖像衍慶宮謚武定明昌五年配享世  
廟

完顏宗磐本名蒲盧虎太宗子天輔五年佐完顏杲取中京熙宗  
時官至尙書令拜太師封宋國王以逆誅

宇文虛中字叔通成都人宋黃門侍郎使金留仕爲翰林學士承  
旨皇統初上京諸虜俘謀奉叔通奪兵仗南奔事覺繫獄諸貴  
夙憾叔通侮慢之乃鍛鍊所藏圖書爲反具并連高士談受誅  
人皆冤之

吳激字彥高自號東山宋宰臣拭子使金被留爲翰林待制出知  
深州遽卒彥高工詩其字畫得婦翁米元章筆意亦以知名留  
金遺山稱其詞爲大朝第一有東山集今佚

張斛字德容漁陽人宋武陵守入金官秘書省著作郎德容能詩  
兼工字畫有南游北歸等集今佚

蔡松年字伯堅父靖宋燕山守郭藥師敗靖以燕山降元帥辟松  
年爲令史後除眞定府判官遂爲眞定人官至右丞相加儀同  
三司封衛國公謚文簡伯堅事繼母以孝聞自號蕭閒老人文  
詞清麗與吳激齊名時號吳蔡體

高士談字子文一字季默宋韓武昭王瓊之後宣和中任忻州戶  
曹入金官翰林直學士金諸貴欲以藏圖書死宇文虛中遂與  
禍有蒙城集今佚

施宜生字明望邵武人宋政和中爲潁州教授後以罪北走事僞  
齊不得志金擢爲太常博士官至翰林院侍講學士自號三住  
老人使宋歸以洩軍情烹死明望在潁州時從趙德麟游頗得  
蘇門沾丐

曹望之字景蕭其先臨潢人遼季移家宣德天會閒以秀民子選  
充女直字學生除西京教授世宗朝官至戶部尙書景蕭有才  
而躁進旣貴益刻苦讀書有詩集已佚



徒單克寧本名習顯其先金源縣人後占籍萊州熙宗時以母舅左丞相希尹薦爲符寶祇候官至尙書令太師封淄王卒諡忠烈配享章廟史稱克寧功高而身愈下位盛而心愈勞可謂大

臣

石琚字子美定州人父皐爲郡吏有陰德琚自幼讀書過目成誦天眷二年進士第一官至右丞相封莘國公卒諡文獻配享世廟子美遭遇世宗君明臣良一時無二學亦賅洽

祁宰字彥輔江淮人宋季以醫術補官金師破汴得之隸太醫累遷中奉大夫太醫使煬王欲伐宋上疏切諫戮于市籍其家天下哀之世宗詔贈資政大夫復其田宅章宗擢其子爲尙藥局都監諡宰曰忠毅

申良佐

蔡珪字正甫松年子天德三年進士官至禮部郎中出守濰州道卒正甫七歲賦菊詩語意驚人擢第後不求選調日求未見書

讀之辨博冠當時金初如宇文虛中吳激蔡松年施宜生輩文墨雖工然猶借才異代惟正甫爲金代文章正宗其著述甚夥今皆不傳

王寂字元老薊州玉田人天德三年進士官至中都路轉運司使卒諡文簡元老詩文清拔爲滹南莊靖二家先導有拙軒集劉汲字伯深渾源人天德三年進士官至翰林供奉自號西巖老人有西巖集今佚

張公藥字元石宰相孝純子滕陽人以文蔭入仕官鄆城令仕至昌武軍節度副使詩號竹堂集今佚

馮子翼字士美大定人正隆二年進士官至同知臨海軍節度使事

完顏宗浩字師孟昭祖四世孫漢國公昂之子貞元中爲煬王入殿小底官至尙書右丞相卒諡通敏師孟與僕散揆皆才兼將相世宗倚之以成大業者



梁襄字公贊絳州人大定三年進士官至保大軍節度使公贊爲薛王府掾時上疏諫止世宗游金蓮川直聲著朝廷學問亦賅洽

周昂字德卿真定人第進士爲南和簿歷官監察御史以事斥謫南海復起爲三司判官大安軍興以權行六部員外郎從宗室承裕軍城陷與子嗣明同死節德卿以孝友聞文筆高雅其謫也坐以詩送路鐸事被斥其起也以邊功有常山集今佚

徒單鑑本名按出猛安人大定九年策女直進士及第者二十七人鑑與上選授中都路教授官至左丞相封廣平郡王鑑明敏方正學問賅博名士多出其門胡沙虎之亂賴鑑一言而宣宗立宗社以安著宏道集今佚

党懷英字世傑宋太尉進十一代孫父純睦爲泰安軍錄事參軍卒于官遂爲奉符人大定十年進士官至翰林學士承旨卒謚文獻趙閒閒稱世傑文似歐柳詩似陶謝至篆籀入神則李陽

冰以後一人而已

劉迎字無黨東萊人初以廕試部掾大定十四年進士除幽王府記室改太子司經自稱無諍居士有詩文樂府號山林長語詔國學刊行今佚

王庭筠字子端熊岳人大定十六年進士官至翰林修撰子端七歲能詩風流醞藉冠冕一時文亦高出時輩所薦引如趙秉文馮璧李純甫皆名士世以知人許之平生愛天平黃華山水自號黃華山主

趙沔字文孺自號黃山東平人大定中進士官至禮部郎中文孺學道有得尤工書懷英小篆爲李陽冰後一人世以文孺配之號曰党趙

高汝礪字巖夫應州金城人大定十九年進士官至尙書右丞相封壽國公卒後配享宣廟巖夫以慎密廉潔結主知而乏剛毅故遺山以爲守成良相恨所遭不時耳



劉昂字之昂興州人大定十九年進士官至左司郎中降上京留守判官

王澗字逸賓自臨洛遷汴梁明昌中以馬吉甫薦官鹿邑主簿旋歸逸賓孝友天至博學能文與王彥功游宗之齊名人皆以高士目之作○潤一

師拓字無忌平涼人舉進士不中明昌中有司薦其才以嗜酒不果詩有氣象鍊句尤工

蕭貢字真卿咸陽人大定二十二年進士由涇川觀察判官仕至御史中丞以戶部尚書致仕卒謚文簡真卿博學能文人比之蔡正甫官右司郎中時修泰和律令為帝嘉歎以蕭何期之著有史記注五聲韻譜文集今皆佚

趙秉文字周臣磁州滏陽人閒閒其自號也大定二十五年進士官至禮部尚書金代文章正宗正甫開其端周臣昌其緒裕之殿其終著述甚夥傳于今者有滏水文集

張行信字信甫先名行忠避莊獻太子諱改莒州日照縣人御史大夫暉子大定二十八年進士為銅山令累官至尚書左丞信甫純正真率奏事不知避忌兩登相位殆若無官愚賢皆以正人目之氣節亦在高汝礪上

胥鼎字和之代州繁峙人尚書右丞持國之子大定二十八年進士官至平章政事封英國公和之為宣哀時名相為政靜鎮南渡後以書生鎮方面者一人而已

侯摯字莘卿東阿人明昌二年進士官至平章政事封蕭國公致仕居汴崔立以汴城降為北兵所殺莘卿威重敢言喜薦士雷淵麻九疇輩皆其進用南渡宰執中人望最重

酈權字元興安陽人武寧軍節度使瓊子以門資敘宦不達朝廷高其才明昌中召授著作郎旋卒有坡軒集今佚

龐鑄字才卿大興人明昌五年進士官至京兆運使才卿風流文采為時輩所推兼工字畫自號默翁



田琢字器之蔚州定安人明昌五年進士調寧邊在平主簿官至  
山東東路轉運使權知益都府事行六部尙書宣差便宜招撫  
使

楊雲翼字之美樂平人明昌五年進士第一興定末拜吏部尙書  
官至翰林學士卒諡文獻之美初學語卽作字日誦數千言于  
學無所不能與趙閒閒代掌文柄人稱楊趙且剛直敢言人所  
不敢言爲宣宗敬畏金百餘年來士大夫身備四科惟之美一  
人著述見于史者今皆不傳

陳規字正叔絳州稷山人明昌五年進士官至右司諫出爲中京  
副留守未赴卒正叔性剛學博爲諫官時天子敬之近習畏之  
南渡諫官稱陳許而正叔不以訐直自名劉從益見其所上八  
事嘆爲宰相才惜當時不能用云

許古字道真河間人汾陽軍節度使安仁子明昌五年進士官至  
右司諫道真在宣宗朝以敢諫與陳規齊名致仕歸伊陽郡守

爲起伊川亭每乘舟游飲老稚爭爲挽舟其爲時人愛慕如此  
韓玉字溫甫漁陽人明昌五年進士官至河平軍節度副使囚死  
華州溫甫官翰林應奉時應制一日百篇文不加點又作元勳  
傳爲章宗所稱大安三年都城受圍溫甫約華州李公直入援  
當路忌其功言公直反置極刑以溫甫預謀囚華州郡學死士  
論冤之

王若虛字從之自號慵夫藁城人承安二年進士官至翰林直學  
士從之經史賅博爲一代冠且長于經濟百不一試易代後北  
歸鎮陽以老有滹南遺老集

馮延登字子駿吉州人承安二年進士天興中官禮部侍郎城陷  
投井死子駿于正大末北使見留降之不從羈管二年放歸卒  
以節見受詩法于趙閒閒有橫溪翁集今佚

馮璧字叔獻別字天粹承安二年進士厯州縣召入翰林官至同  
知集慶軍節度使叔獻在太學有聲其學長于春秋宣宗朝屢



以使指鞫大獄權貴有跋扈而朝廷不能摧伏者能以法制之詩筆清峻如其人趙周臣李之純王從之皆重之

李純甫字之純宏州襄陰人承安二年進士官至尙書右司都事終京兆府判官之純天才辨博以小官上萬言書後度其道不行益放于酒浸淫釋氏學遂駁而不純遣山謂中州豪傑惟之純與雷希顏有鳴道集

李俊民字用章晉城人承安五年進士第一官應奉翰林文字未幾棄官教授隱于嵩山自號鶴鳴老人元世祖召見仍乞還山卒賜諡莊靖先生用章以遺老遯荒蹟類遺山詩文亦如騷之斬有莊靖集

李秉鈞官尙書省掾泰和初定功名諡法李上書請諡祁宰制曰可太常諡宰忠毅

王特起字正之代州崞縣人泰和三年進士調真定錄事參軍官至司竹監使正之無所不能長于辭賦與屏山爲忘年交官真

定有惠政民立碑頌之

趙元字宜之定襄人經童出身舉進士不中中年及調鞏西簿未幾失明宜之以詩鳴泰和閒病廢壹志于詩五言平淡處尤妙李屏山亟稱之自號愚軒居士

完顏壽字子瑜興陵之孫越王之子封密國公子瑜好學如寒士工詩文家藏法書名畫與中秘等喜交天下賢士自趙閒閒以下皆推重之爲宗室第一流人所居有樛軒又有如庵自號樛軒老人詩集名如庵小稿今佚

劉從益字雲卿渾源人大安元年進士官至監察御史被黜起爲葉縣令入授應奉翰林文字旋卒雲卿博學強記其罷御史以忤當路尹葉縣有惠政邑人留之不得聞其死立石頌德長于詩五言古尤工子祁郁皆有名有蓬門先生集今佚

雷淵字希顏一字季默應州渾源人崇慶二年進士官至監察御史終翰林修撰希顏治縣有劇才官御史論天下事不報募田



疇陳元龍之為人人亦以古人期之遺山論中州豪傑獨推希顏之純云

完顏素蘭一名翼字伯揚至甯元年進士官至金安軍節度使兼同華安撫使宣宗召赴行在道中遇害伯揚在諫垣首攻高琪有古諍臣風

元德明秀容人唐禮部侍郎結之後累舉不第以詩酒自娛自號東巖

郝天挺字晉卿澤州陵川人太學生崇慶之變知時事不可為遂歸隱從遊極盛裕之其最也貞祐初人爭南渡而扼于河河陽三城至淮泗數千里流民數百萬多飢疫死者晉卿貽書范元直使聞諸朝乃得疾速放渡河朔之民全活甚眾孫經以忠節文章冠元代

完顏宗魯貞祐二年官樞密承旨提舉軍器李獻能字欽叔河中以省元賜第廷試第一宏詞優等授應奉

翰林文字歷官至鎮南軍節度副使充河中經歷河中陷道梗不得歸就權陝府行省左右司郎中軍變殉節欽叔以純孝為士論所重卒以節死詩其餘事亦高人一等

高永字信卿漁陽人自號應菴王中立字湯臣岢嵐人博學強識元遺山嘗從之遊晚年易名雲鶴自號擬樹人皆以仙稱之

劉炳葛城人貞祐三年中進士第即上書言十事宜宗善之而不能補御史臺令史

王渥字仲澤以字行興定二年進士調管州司候不就高庭玉節度武勝軍辟為經歷官至權右司郎中天興元年出援武昌為元兵所殺仲澤博通經史其辨博為李之純所稱天下談士三人之一也詩其專門

秦略字蘭夫陵川人少舉進士不中以詩自業自號西溪老人有集今佚



劉昂霄字景玄別字季房陵川人以父俞廕調慶陽軍器庫使不就當道方薦試宏詞已卒景玄過目不忘于學無所不闕其卒也年才三十七

雷瑄字伯威坊州人以薦從事史館調八作司使亂後南奔爲兵士所殺伯威博學能文與并州李汾善

元好問字裕之太原秀容人德明子興定五年進士官至行尙書省左司員外郎金亡不仕裕之七歲能詩見知于趙開開易代之後謂國亡史作以金源著述自任構亭曰野史亭記錄至百餘萬言今所傳止中州集其詩文足以冠金元兩代有遺山文集

李汾字長源平晉人元光末舉進士不中以薦得從事史館後署行尙書省講儀官爲參知政事恩烈所害

麻九疇字知幾莫州人興定末府試第一正大三年以侯摯趙秉文薦試館職賜二甲第一人及第授太祝官至應奉翰林文字

知幾三歲識字七歲能草書及大字數尺者有神童稱後博通五經天性野逸不與世合其詩精深峭刻似其爲人

王元粹字子正初名元亮後改平州人正大末爲南陽酒官遭亂爲黃冠師與從弟鬱同以詩名

徒單公履

麻革字信之臨晉人兵部侍郎秉彝子元末隱居教授以終河汾諸老八人之一也元房祺爲編其詩

段成己字誠之號菊軒稷山人正大間進士官宜陽主簿金亡元起爲府提舉教授不赴與兄克己同以文章擅名見稱于趙閒閒又皆以節著

王鬱字飛伯平州人天興初死于兵詩學温李工樂府

張璪字君玉大名朝城人嗜作詩至老不衰

杜仁傑字仲梁一字善夫濟南長清人與遺山善元時累徵不起李獻甫字欽用河中人第進士爲咸陽簿官至鎮南軍節度使死



蔡州難欽用與從兄欽叔兄欽止欽若故將種而同時四進士  
 人門之秀照映一時居官有幹略博通羣書尤精左氏及地理  
 之學詩文號天倪集今佚  
 陳時可字秀玉自號寂通居士劉祁之友

金文雅總目

卷一

賦七篇

卷二

五言古詩八十八篇

卷三

七言古詩五十九篇

卷四

詔令十六篇

冊文七篇

卷五

奏疏十八篇

卷六

奏疏八篇



表五篇

卷七

書五篇

箴一篇

銘六篇

頌二篇

贊六篇

卷八

廟碑八篇○闕一篇

上梁文一篇

卷九

記十六篇

卷十

記七篇

序引九篇

卷十一

議三篇

論五篇

原一篇

說二篇

題跋十一篇

卷十二

祭文三篇

哀辭二篇

傳一篇

墓銘九篇

卷十三

墓銘八篇



卷十四

墓表六篇

卷十五

墓碑七篇

卷十六

墓碑四篇

金文雅卷一目錄

賦

興學賦

潞州志

申良佐

巖蔓聚奇賦

王寂

海青賦

趙秉文

栖霞賦

趙秉文

遊西園賦

趙秉文

秋望賦

元好問

行齋賦

元好問



金文雅卷一

賦

興學賦 并引

申良佐

秀水莊仲方編

河東為天下雄勝之地而上黨乃河東名郡故號為天下  
 脊其人物勁豪自古忠臣義士多出焉郡之長衢之東南  
 文明之地有學校存焉自隋而上遠而不可知見之碑刻  
 者李唐以來於此已有之矣厥後世變多故其學校亦隨  
 而興衰迨乎國朝撫定之後專以文學取士而郡之士子  
 紆青拖紫者比比有之學之興也從可知矣至正隆閒學  
 者多困于征役不暇修習其學舍漸至摧毀幾不能蔽風  
 雨良可惜哉欽惟主上中興以來敦復文教俾郡國俱修  
 學校獨斯郡之學累經前政寢而不議自通守權鎮喬侯  
 下車之始首議興修自大定丁酉五月丁巳經始至是年





十月乙亥告成越明日丙子集僚屬郡儒於議道堂大合樂以落之方此工之將畢也適有旨立學官養天下之士固其興衰自有時乎何如此之偶然也僕固嘉喬侯興學之勤意又且樂遇明時之爲幸故敢作興學之賦以獻焉其詞曰

吾聞三代之道兮立庠序建首善自於京師至于鄉里有教焉將令俗易而風移使四方皆從其化兮足以立太平之基故然明請毀鄉校子產對所以議政之善否奈何而毀之如其廢而不修鄭人刺以子衿之詩雖文化由上之人倡率亦由守令奉承以周施故文翁起學於成都之市經明行修者皆足以任使自後郡置其學官由蜀郡而爲之始范甯亦立學於餘杭使諸生敦行而潔已致風行而化流自晉之中興以來未有如此嗟吾邦學舍之荒涼土木盡爲之摧毀豈止學者之不可居芻蕘牧豎者皆得而至止諸生有待其興修蓋亦累年於茲矣嗟我喬侯之來何莫兮今方

幸得一新而崇起將以尊師講道義明經取青紫由是鄉里之間郁郁乎有文絃誦之聲洋洋乎盈耳文翁固無少讓范甯烏足爲比蓋誠加勤意而然豈虛尙清談而已佇看不次而升之廟堂之上誠能教育天下英才之美蓋君子之所樂固無以加於是諸生或有謂僕曰方此工之將畢也適有旨養天下之士何其不謀而同歸異處而同出僕應之曰斯固興廢之有數亦乃君臣之德一僕方悼道之鬱滯而文明之化不圖復見於今日固將與諸生樂昇平之永履慨學廢於疇昔倘非斯道之復興則吾徒將安之而講習噫喬侯之心仁人之心也狂斐之言形容之不足故復系之以短什且與諸生歌之詠之所以推揚其茂實也

巖蔓聚奇賦

王寂

伊合抱之巖藤迹其生之有漸挺標末其不凡商世用而尤瞻裁搗馬之短箠縮維舟之長纜斲滇池飛電之杖組湘浦含風之簞獨高節之擁腫外纍纍然中歉顧匠石之數過不側目而一覘有



好事者非常風鑿破長橋之蛟卵剖巴山之猿嗛其混然而天成  
微斧鑿之可驗彼甃石雖潔而近乎俗金玉雖珍而幾于僭當罇  
俎之勝處惟瘦君之獨占惜流落于市井為時人之所厭幸洪泉  
之賞音輟酒直而見念不然則灰爨下之桐而失鄴城之劍老人  
既歸而謀諸婦曰我以酒隱處身純儉欣此物以有託了吾生而  
無憾於是撥春甕之嘈嘈漉乳泓之湛湛挹彼注茲十分激灑追  
顏子之瓢飲陋管氏之反坫咀嚼石蟹之霜螯狼籍荷盤之菱芡  
少焉既夕風清天淡舞月影兮徘徊吸露華兮汎濫已而先生徑  
醉也宮錦淋漓角巾欹墊捲河漢於一酌盡江湖於一醺洗戰國  
之蠻觸弔古今之時暫陶陶乎釋身世之羈縛浩浩乎謝功名之  
機陷然後神遊八表兮其將以躡冥鴻之背而探驪龍之頷也

海青賦

秦和扈從春水作

趙秉文

霜空蕭條塞草先白海樹無枝海雲寡色黯兮遼迴風悲日匿何  
鷲鳥之不羣起翰波而一息爾其俊氣橫鶩英姿傑立頂摩穹蒼  
翼迅東極鐵旬利觜霜排勁翮角膝插腦細筋入骨顧盼雄毅飛  
騰滅沒旦寄巢於扶桑夕刷羽於碣石於是乃命虞人遡風繳繒  
□設萬里足繫一枝心折遂投軀以委命恥摧翼以喪節奚奴頭  
千髯官指百時饑飽以喉呼謹寒温之調適臂不暇弛鈴不停掣  
猶恐懷林邱夢砂磧恨身繫而子留歎雄孤而雌隻也逮其骨肉  
融性情習違龍沙入閭闔蒙禁衛之專寵叨錦鞬之前席思報功  
於所養甘賈勇於一決既而新□屆候太簇司月陽燄浮冰漸折  
水溶溶而汎綠鵝翩翩而下唼探使星馳屬車雷發千輿隱嶙萬  
騎飄瞥上將幸乎春光之中所以觀民風而宣鬱結龍旆標而殿  
門敞虎旅圍而鼓聲疊忽水擊而驚飛乍雲翔而成列玉爪翻臂  
錦絛下繼初貼水而徐回倏干雲而上擊雨血紛紜風毛磔裂象  
廣寒之舞紛霓裳之回雪侶吳宮之戰驚玉顏之喋血壯如破敵  
勢甚擒賊至如關羽義勇張綱奮烈取鯨鯢于堅陣叱豺狼之當  
轍固亦釋豐狐之九尾略狡兔之三穴蓋猶賞驥足之神駿且以



勸忠於英傑也既而壽杯舉臣工悅天威暢皇恩洽背長楊兮而趨京闕

栖霞賦 送道人還山

趙秉文

粵有人兮襲芳華跡城郭兮志烟霞賦言歸兮杳何許蹇遲迴兮徒延佇貝闕兮珠宮撫膝上兮絲桐高情兮天外歸鴻靈宮兮玉紀玄都兮寶藏祝君王兮萬壽侍玉宸兮天上辱莫辱兮多憂樂莫樂兮無求望白雲兮歸休三年胡爲兮此淹留朝游兮山南暮游兮山北徙倚兮亭上聊逍遙以終日日舞兮清暉臨深兮翠微西山扶兮曉釀秋水樂兮朝饑山近兮多雨雲昏昏兮承宇烟銷兮霧散見恆茂兮遠樹樹斷兮天開鴈翩兮南渡忽人歸兮鳥盡但空山兮日暮日暮兮浮雲滋目極千里兮傷心悲山中人兮歸來白首不歸兮何時亂曰山中人兮烟霞宅翠羽簾兮白玉額有友麋鹿兮侶猿鶴飲清泉兮坐白石山中人兮烟霞衣青天成幄兮白露成帷風爲襟兮玉爲佩娛清暉兮澹忘歸山中人兮煙霞

語黑霓落手兮醉毫舞蓬萊山兮在何處乘清風兮欲歸去

游西園賦

趙秉文

九月令辰皆醉趙子獨游西園蓋故苑同樂之地于時天高氣清風物淒厲草綠慘以斷蔓果紅薦而脫節若乃藻扃闥簷摧檻圯曲池荒而飛螢灌木老而雉雉嗟物是而人非何昔榮而今悴既而登高臺俯清泚天落鏡中水涵空際物無倒影之心水無涵空之意心與境忘境融神會先生一笑而作渺歸鴻於天外

秋望賦

元好問

步裴回而徙倚放吾目乎高明極天宇之空曠閱歲律之崢嶸於時積雨收霖景氣肅清秋風蕭條萬籟俱鳴菊鮮鮮而散花鴈杳杳而遺聲下木葉於庭臯動砧杵於蕪城穹林早寒陰崖晝冥濃淡霏拂繞白紆青紛叢薄之相依浩霜露之已盈送蒼蒼之落日山川鬱其不平瞻彼輶輶西走漢京龍蟠虎踞王伯所憑雲烟慘其動色草木起而爲兵望崧少之霞景渺浮邱之獨征汗漫之不



可與期竟老我而何成挹清風於箕穎高巢由之遺名悟出處之  
有道非一理之能并繫南山之石田維景略之所耕老螭盤盤空  
谷淪精非雲雷之一舉將草木之偕零太行截天大河東傾邈神  
州於西北悅風景於新亭念世故之方殷心寂寞而潛驚激商聲  
於寥廓慨涕泗之緣纓吁咄哉事變於已窮氣生乎所激豫州之  
士復於慷慨擊楫之誓西域之侯起於窮悴傭書之筆諒生世之  
有爲寧白首而坐食且夫飛鳥而戀故鄉嫠婦而憂公室豈有夷  
墳墓而剪桑梓視若越肥而秦瘠天人不可以偏廢日月不可以  
坐失然則時之所感也非無候蟲之悲至於整六翮而睨層霄亦  
庶幾乎鷲禽之一擊

行齋賦

元好問

戊子冬十月長壽新居成仲經張君從予卜鄰得王氏之  
敗屋焉環堵蕭然不蔽風日君爲之補罅漏治蕪穢葢十  
日而後可居華門圭竇故事畢舉取君子素其位而行之

義名曰行齋而乞文於予予以爲士之貧至於君極矣無  
祿以爲養無田以爲食無僮僕爲之負販無子弟爲之奔  
走無好事者爲之謀緩急而助薄少率貲無旬日計泰然  
以閉戶讀書爲業不以爲失次而以爲當然不以爲怨不  
以爲憂而又且以爲樂也然則不謂之無媿其名也而可  
乎迺爲賦云

賦分在人如物有常反鶴與鳧無益短長力有可乘勝天不祥福  
不盈睫一敗莫償莫難養心操存舍亡出入無時兮莫知其鄉飽  
飢有時而激兮怒殆豢虎之貽殃我思古人動靜有方靜以養虛  
剛以作強辱以處汙愚以退藏屹中立而不倚邈橫潰而獨障直  
釣磻溪之魚禿節單于之羊有漆身以爲厲自被髮而爲狂任汙  
世而執詭徇殊俗而解裳太阿存兼善之達緼袍有不求之臧唯  
夫長劍大冠以揖讓人主之前者若固有故木食澗飲雖至於勞  
筋骨而餓體膚者爲無傷古有之居不隱者志不廣身不抑者志



不揚士固有遜世而不復見然愈揜而愈彰南山蒼蒼北風雨霜  
有蘭不彫俟春而芳偉哉造物又將發吾子之幽光耶

太阿即阿衡見文選

金文雅卷一

金文雅卷二目錄

五言古詩

病後寄開甫

吳激

平安關道中二首

張斛

丁巳九月夢與范季霑同登北潭之臨芳亭覺而作詩記其

事以示范

蔡松年

七月還祁

蔡松年

梨花

高士談

臥病有感二十韻

朱之才

感寓

蔡珪

南園步月

劉汲

許下三庚劇暑盛于他州懷思故鄉嶧山山水真清涼境界

也感而作此

張公藥

岐山南顯道冷香亭

馮子翼



感秋

穆陵道中二首

西湖芙蓉

寄題禹城孫氏茂德亭

南口

晚到八達嶺下達旦乃上

張禮部棲山真樂圖樓卷中作溪

內鄉浙江張浮休窪尊為二兄賦

冬夜二首

中秋

初望少室

木犀

自鶴壁游善應洹山

感秋

周昂

党懷英

党懷英

劉迎

劉迎

劉迎

王庭筠

王庭筠

師拓

趙秉文

趙秉文

鄺權

鄺權

王若虛

失子

同希顏怪松

村居夏日

讀樂天無可奈何歌

泛舟回瀾亭坐中作

和淵明始春懷田舍

九日登少室絕頂同裕之分韻得蘿字

濟南珍珠泉

同侯子晉賦鴈

贈荅彥文相過之作

枕上

邺城秋夜懷李仁卿

跋賈天叔所藏段志寧山水

中秋

王若虛

馮壁

趙元

趙元

劉從益

劉從益

雷淵

雷淵

元德明

元德明

元德明

李獻能

高永

王中立



三門津

王渥

拳秀峰

秦略

游五渡谷

劉昂霄

古意四首

雷瑄

緱山置酒

元好問

穎亭留別

元好問

元魯縣琴臺

元好問

龍門雜詩二首

元好問

乙酉六月十一日雨

元好問

觀浙江漲二首

元好問

五松平

元好問

贈荅楊煥然

元好問

曉發石門渡湍水道中

元好問

學東坡移居八首

元好問

梨花海棠二首

元好問

宿張靖田家

元好問

同白兄賦瓶中玉簪

元好問

別李周卿三首

元好問

九日讀書山中三首

元好問

元裕之以山游見招兼以詩四首為寄因以山中之意仍其韻

麻九疇

西山避亂三首

王元粹

置酒半山亭得秋字

麻革

題梁氏靜樂堂

段成已

陳子正安容室

段成已

傷別曲

王鬱

送侯道士

張璪



金文雅卷二

秀水莊仲方編

五言古詩

病後寄開甫

吳激

暗蛩咽幽響隙月漏微光溪上風雨過翛然有餘涼病瘦鶴骨立  
低垂不能翔懷我中山兄開經焚道香猿嘯耿清夜鐘鳴悠夕陽  
商秋早晚至夢寐松楸蒼

平安關道中二首

張斛

高林俯青冥柯葉森若織陽光已轉午陰嶺仍半黑崢嶸亂石閒  
行子有苦色深臨地勢入涉險天宇塞四顧無所投迹重去未息  
悵然增百憂冥冥羨歸翼  
窮冬十日陰積雪千山路晴雲開半嶺落日猶在樹悠悠客心速  
慘慘天色莫寒鳥各有依解鞍尚無處游魚誤銜鈎元豹終隱霧  
行行謝冠冕復我林壑趣



丁巳九月夢與范季霑同登北潭之臨芳亭覺而作詩記其事以示范

蔡松年

高陵五六松潭水涵清陰白鳥如避世巢居得幽深雜花眩青紅  
苦節方森森何人作虛亭想像雲棲心我夢涉陳迹君亦同登臨  
相與定嘉名洗去花草淫看雲撫修碧夕景低遙岑風林淡秋月  
霜枝鳴玉琴兩意誰識之好處煩幽尋閒居志則同歲月能駸駸  
時無陶彭澤此曲難知音亭前有奇石遷流失山林顧亦如我曹  
鬢髮風沙侵小兒重外物列屋享千金區區心甚長因循困華簪  
忽焉事大謬危機恐難任平生下澤車斯言吾所欽志士願不辱  
俗情便孔壬自喜迹猶淺鳧鴈容浮沈泥行自蕭散世路皆崎嶇  
此邦真可老城郭環清潯結廬與君俱開寫平生襟里巷日還往  
杖屨行謳吟還尋夢游處無忘神所箴

七月還祁

蔡松年

洪河注天南兵氣橫高穹我從兵前來歸心疾驚鴻官柳未搖落

蓮苻香濛濛吏舍在前村舊年養疎慵爰自三軍去青苔瘞人蹤  
夕陽叩柴門歡迎來僕僮濁酒古罍洗停觴問新松卻對一床書  
睡鴨孤烟中土花暈湖玉冰絃冷霜桐燈火未可親露坐茅堂東  
西山月中淡夜茶煮松風到床便安寢不復知晨鐘平生幽棲心  
斯言略形容人道動有患百態交相攻而我觸類真冶容鄙青紅  
非才見臨事叩之輒空空知難不知回飄流劇飛蓬暫去聲利場  
樂佚猶無窮況於得行意蕭洒畢此躬勿爲才者傳從渠作夔龍

梨花

高士談

中原節物正梨花配寒食黃昏一雨過滿地嗟狼籍塞垣春已深  
花事猶寂寂朝來三月半初見一枝白爛熳雪有香瓏鬆玉仍刻  
芳心點深紫嫩葉裁輕碧懶慢不出門雙瓶貯春色殷勤遮老眼  
邂逅慰愁夕一尊對花飲況有風流客酒闌思故鄉相顧空歎息

臥病有感二十韻

朱之才

臯蘇粲園英澤芝紛水葉赤弁舞襪肌黃袍緩老頰鳴飛各有適



吾獨嗟衰繭齒髮久已疎又復失調變梁肉謝鼎俎參苓富巾篋  
葵扇風未來桃笙汗初浹呻吟和哀蟬夢寐追化蝶撫枕念平生  
世故飽更涉弱齡負奇志胸覬盤煒燁夜後傳富訪朝待渭濱獵  
荀爽歲九遷康侯日三接功業著鐘鼎聲名垂史牒那知事大謬  
舉趾得躡躅多難集莫年百願亡一愜寒灰消寸心清淚腐雙睫  
坐令孤鵬驚化作瘴鴛跼憂來復自慰人生幾莫莢呼吸過百歲  
俯仰失千劫乘流須縱權遇坎即停楫些語不成騷商歌鼓長鈇

感寓

蔡珪

九官名世人制作歸一夔達樂不達禮漢儒言足嗤古人寓意耳  
結髦持鍛錐俗子未易識絕藝聊相推坐令編簡門亦以專門奇  
堂堂張長史楷妙世莫知謂予言不信願視郎官碑

南園步月

劉汲

雲橫樹外山樹映山巔月微風拂寒枝疏光散清樾幽歡難相遇  
此景安可忽從來山水心不爲塵埃沒

許下三庚劇暑盛於他州懷思故鄉嶧山山水真清涼境界  
也感而作詩

張公藥

魯東百里近福地曰鳧繹千峰開玲瓏絕澗瀉湍激岱宗古獨尊  
象繹了不隔嶧山至泰不遠此山許攀聯朝著有班秩虛巖互霞蔚秀  
石森玉立泉聲動環珮林樂盡竽瑟莊子樂出樹老潤饒菌果熟香  
隕實漱風松落花泓雪崖溜蜜木輒虎磨癢沙迴鳥伸翮水禽嬉  
禹錫集竹葉若來往桃源當甲乙曾經晉人隱晉郗鑒因避亂挈  
傳喜脫塵網密事往不記年人說猶前日我來官許下濁暑病逾  
劇慢膚便枕簟白汗沾巾幘屢輟五夜眠輒廢中盤食炎官令方  
虐著意不憐客語此作惆悵可以知得失遙知舊經行雲起水邊  
石平生二三子相對坐橫策今世葛天民何容挽之出

岐山南顯道冷泉亭

馮子翼

溪橋小雪晴水村霜月冷暗香林薄閒得偶璀璨影殷勤南夫子  
移植在人境芝蘭馥氤氳珠璧照光炯小屋茅草葢幻此蕭洒景



看花藝松明醒醉漱苔井文章聊嬉戲辭氣頗馳騁州縣不着腳  
時人笑清鯁我官西州掾簿領不知省頻遭官長罵勢屈石在頂  
門庭可張羅陋巷車轍靜山歌聽嘲哂舞伎或瘤瘿引睡閱文史  
朝日無從永夢到五柳莊身居六盤嶺揭來南山下旅思淒以耿  
金罍照衰朽玩味得俄頃傍人怪迂疎佳處當自領

感秋

周昂

秋氣入行帳愁人中夜知雞聲與人語耿耿異常時清晨起危坐  
感歎不自持羲和馭飛轂往返無停期春草如昨日已復悲離離  
顧謂鏡中髮爾衰安得遲結束媚鞍馬荒山去委蛇黃花泣宵露  
綠野含晨曦吾事久不諧悠悠隨所之有懷南澗約敢賦北山詩  
沂山一何高羣峰鬱孱顏我行問遺老云此小太山望秩有常祀  
其神號東安草荒穆妃墳雨剝漢武壇神仙果何在可想不可攀  
千年等一昔俯仰悲人寰東望蓬萊宮咫尺滄波間

穆陵道中二首

党懷英

重山復峻嶺溪路宛盤盤流水滑無聲暗瀉溪石間岸草淒以碧  
鮮葩耀紅丹高雲映朝日流景青林端我行屬朱夏欲愒不得閒  
山中有佳人風生松桂寒

西湖芙蓉

党懷英

林飈振危柯野露委荒蔓孤芳爲誰妍一笑聊自獻明妝炫朝麗  
醉態羞晚困脈脈懷春情悄悄驚秋怨豈無桃李媒不嫁惜嬋媛  
悠哉清霜莫共抱蘭菊恨

寄題禹城孫氏茂德亭

劉迎

濟南孫夫子養素抱絕識家有五畝園種樹如種德枝葉深覆護  
根本飽封殖要令方寸地不著荆與棘流芳被鄰里餘蔭連阡陌  
居然物隨化草木盡佳色河陽藝桃李壽張蒔梓漆至今青史上  
相望如黑白乃知百年用賴此一日積君今尙隱約白首勤墾闢  
人心亦天理否泰有終極會待東風來吹春滿花國

南口

劉迎



危峰張屏幃峻辟開戶牖翮騰來陣馬翔舞下靈鷲秀色紛後前  
晴嵐迷左右重陰忽障翳虛籟競呼吼深迂愛風日高亢捫星斗  
帝居望北闕村落當南口軍都漢時縣遺跡奄存否中郎讀書處  
遺構想摧朽誰云用武地經訓乃淵藪我家膠東湄樸學歎白首  
居鄰通德里況此見師友慙無書帶草采采爲盈手何以醉先生  
清溪綠如酒峻辟之辟  
疑當作壁

晚到八達嶺下達旦乃上

劉迎

車馬兩山閒上下數百里縈紆來不斷奕奕似流水鯨形曲腰管  
蛇勢長首尾我車從其閒搖兀如病齒推前挽復後進寸退還咫  
息心固安分尙氣或被指徐趨自循轍躁進應覆軌行行非我令  
柅亦豈吾使倦僕困號呼疲牛苦鞭箠統如五更鼓相慶得戾止  
歸來幸無恙喘汗正如洗何以慰此勞村醅正浮蟻

張禮部溪山真樂園

王庭筠

悠悠春天雲想見平時閒朝遊溪橋畔莫宿山堂閒澹然不知愁

亦復忘所懼出山初無心既出還思山人閒待霖雨欲歸良獨難  
山堂悵何許蕭蕭松桂寒

內鄉浙江張浮休窪尊爲二兄賦

王庭筠

崑花覆我酒酒面照幽妍風如惜花影不肯生微漣空山悄無人  
花枝自留連懷人成獨醉日莫山蒼然

冬夜二首

師拓

雲破月穿牖夜嚴風號隙客子寢不安寒燈照空壁默然不平事  
起坐長太息書但記姓名劍本匹夫敵追奔慕前哲恢張濟時策  
何意造物兒重此稻梁役與酣氣益振孤憤遠飄激非無南山雲  
高臥養虛寂茹芝酌懸流嘯吟展胸臆聖達豈不念且有不暖席  
此抱誰與知乾坤夜寥闕

破屋星斗入疎牖霜風生沈沈夜何久杳杳天不明燈暗飢鼠出  
月朗棲鳥驚幽意苦盤礴厯落窮八紘貧賤豈足戚所思天下英  
盤木無先容竟與枯朽并旃毳脛纒掩藜藿腹不盈鬱鬱命世才



何階伸一鳴僵臥蓬蒿底要路誰爲名恥作埽門謁寧爲醴酒行  
直將叶間闔皎皎開寸誠白日下留照廓廓賢路亨此志恐未必  
搖蕩熱中情

中秋

趙秉文

天風吹河漢明月懸清光清光不可掇流影入杯觴吸此風露魄  
洗我冰炭腸向來功名心一笑雪沃湯人生幾中秋彈指三萬場  
胡爲置熱酒不使心清涼此心如秋月虛明洞八方此身萬化中  
太山一毫芒尙無物與我何者爲彭殤推琴黃葉落矯首白雲翔  
解衣一盤礴清境墮渺茫

初望少室

趙秉文

好山如佳士洗盡名利塵對之斂衽敬可愛不可親一水刻我骨  
一石融我神何況三十六峰與天鄰仰看青礧礧俯矚白磷磷  
因之攜畫本試寫蒼然眞三日宿其下舐筆不敢皴歸來閉閣臥  
枕上山橫陳題詩追所見何必如古人

木犀

鄧權

菊小未堪摘荒池悴芙蓉窮秋不慰眼幽獨將焉如殷勤蕊宮子  
種桂庭之除乘閒弄餘花散落荒山隅從茲雲月裔漂泊生江湖  
娟娟耐凍枝便與羣芳殊琉璃翦芳葆蛾黃拂仙裾唾袖花點碧  
漱金粟生膚好風一披拂九里香縈紆蘭蕙不敢友荃蓀正僮奴  
妄意此尤物化工異吹噓不然九天香安得獨付渠託物寄深縕  
古今一三閭收攬名草木自比君子徒惟茲不挂口無乃聖不居  
抑夫古簡編斷缺秦火餘君看齊魯臣史筆逸其書惜哉不可曉  
臨風爲嗟吁尤憐元祐前不及附歐蘇末路益可惜例進宣和初  
仙根豈易致百死不一蘇昔遊汴離宮識此傾城姝摩娑三品石  
尙想狎客娛卻後十五年微霜半粘鬚一枝再經眼相對憐羈孤  
不知苦何事玉骨乃爾癯故人憐我老尺書遠招呼要趁秋香濃  
共此碧玉壺遙知嬋娟客與我笑一俱

自鶴壁游善應洹山

鄧權



清晨發鶴山瘦馬陵峻嶺春風吹雪容朝霧濕雲影羊腸抱傾崖  
絕壑如下井破關山卻立老眼入絕境人家跨清溪桑柘鬱數頃  
西行復幾里富谷栖短景窮溪水源清溜溜如細綆下流入滿山  
勢合久方騁灘光落鏡明嵐氣排雨冷何年鑿青壁兩佛入禪定  
殘僧久零落遺塔寄烟冥荒涼布金地雜逕樵牧徑同遊成六逸  
轟飲助高興留連更坐臥談笑發嘲咏感物復歎嗟醉語忽徑庭  
青山不愛寶歲歲出礬礦公場沸千夫利井供百鼎誰開爭奪源  
敗此邱壑勝頗思呼有力擲入萬里迴天神定笑我癡絕謾生癭  
長懷古畸人飛夢遶箕穎

感秋

王若虛

西風撼庭柯疎葉鳴策策天地一蕭條羈懷亦岑寂青春恍如昨  
轉盼年半百自從長大來轉覺日月迫功名非所慕老大不足恤  
怛然感時心自亦不能釋清晨理短髮已見數莖白刀鐻雖可施  
殆似兒子劇此身委蛻耳毀棄無足惜況於毛髮閒而乃強修飾

青青如陸展星星行復出畢竟白滿頭復將何所摘

失子

王若虛

妍妍掌中兒捨我一何遽其來誰使之而復奄然去平生三舉子  
隨滅如朝露顧我能無悲其如有天數自從學道來眾苦頗易度  
有後固所期誠無亦何懼人生得清安政以累輕故婚娶眼前勞  
託遺身後慮百年曾幾何為此雛稚悞顧語長號妻此理亦應諭

同希顏怪松

馮壁

崧高地氣靈花木竟妍秀玉峰西南趾有松獨怪陋偃蹇如螭蟠  
奮迅如攫獸葉勁須髯張皮古鱗甲皴菌蠢藤癭怒支離節節瘦  
月上虬影搖風度雨聲驟子落慰枯禪枝樛礙飛鼯盤根萬乘器  
平蓋千歲壽樵斤幸免尋厦匠矧肯構龍化會有時天早期汝救

村居夏日

趙元

官府不著名散迹村落深白雲自朝莫青山無古今愛此夏日永  
門巷多繁陰呼兒具繩床不履亦不簪殷勤好風來為我消煩襟



一飽萬事了何用腰黃金羈勒困名馬網羅多珍禽何如山鹿癡  
呦呦戀長林

讀樂天無可奈何歌

趙元

鳧脛苦太短虻足何其多物理斬不齊利劍空自磨老跼富且壽  
元惡天不訶伯夷豈不仁餓死西山阿天意寓冥漠人心徒揣摩  
不如且飲酒流年付蹉跎酒酣登高原浩歌無奈何

汎舟回瀾亭坐中作

劉從益

昔年醉回瀾猶恨身屬官今年邂逅來身與亭俱閒洗心亭下水  
照眼亭西山溪山如故人喜我復來還有酒澆我胸有花怡我顏  
講鷹乍脫臂但覺天地寬山陰忽回船夜闌情未闌

和淵明始春懷田舍

劉從益

家食自不惡菽水甘清貧學道未有得讀書亦良勤雖勤竟何補  
俛首愧古人靜言閱世故來者日月新況復抱沈疴百憂無一忻  
安得衛生訣益我華池津况如一夢覺不與萬法鄰野人借問我

恐是劉遺民

九日登少室絕頂同裕之分韻得蘿字

雷淵

閒居愛重九佳人重相過登高酬節物少室鬱嵯峨迤邐謝塵土  
夷猶出煙蘿欵如據鼇頭萬壑俯蜂窩浩浩跨積風瀾瀾渺長河  
日車戾紅輪天宇凝蒼波指點數齊州始覺氛埃多我無倚天劍  
有淚空滂沱驚鱗盼奧渚倦翼占危柯悔不與家來結茅老巖阿  
歸途睠老阮廣武意如何

濟南珍珠泉

雷淵

大地萬寶藏玄冥不敢私抉開清玉罅渾渾流珠璣輕明疑夜光  
潔白眞摩尼風吹忽脫串日射俄生輝有時如少靳鬻沸卻纍纍  
風色媚一川老蚌初未知君看一日閒巧歷所不賞遊人隨意滿  
不昇乾沒兒吾謂歷下城繁華富瑰奇貪夫死專利帝意憐其癡  
故露連城珍可玩不可幾若曰天壤間所過皆汝資何必秘篋笥  
自貽伊瑕疵詩成一大笑臆說量天機



同侯子晉賦鴈

元德明

沈沈江浦雲浩浩朔漠雪微生幾寒暑翅老飛欲折樓中見新過  
夕照送明滅欹枕數聲來疎牕耿殘月悲鳴或天性南北隨所愜  
誰念孤旅人年年為愁絕

贈答彥文相過之什

作什目

元德明

剝啄誰叩門開門得吾友握手一大笑慰我離羣久之子富才具  
事業可力取瞻望青松姿衰遲愧蒲柳金閨滿鴛鴦什伯自為偶  
寂莫林野人過從但鄰叟盤飧無兼味筍蕨才適口窮達俱偶然  
相逢且杯酒

枕上

元德明

往時見白髮談笑輕歲月誰謂明鏡裏蕭蕭不勝鐸山林蹉跎久  
世慮初未絕觸物重興懷忽忽不自愜遭逢有奇耦才用隨巧拙  
如何杜陵叟自比稷與契茫茫拊塵編何時卒吾業

郊城秋夜懷李仁卿

李獻能

日人羣動息暝色陰濛濛故人隔潁水嫋嫋生秋風輕風捲纖雲  
碧漢磨青銅坐久襟袖涼皎月升天東伊人如此月霽色羅心胸  
可望不可親倏已駕飛鴻念此太虛閒心交神自通而况千里月  
相望寧不同孤光透薄帷儼如接音容翻翻繞枝鵲唧唧侵堦蛩  
上床轉不寐高樓待晨鐘相思夜何永月落秋床空

跋賈天升所藏段志寧山水

高永

蒼壁雲氣湧長松風雨寒湍流擎山出玉虹飲溪灣胸中無雲夢  
筆底無江山想見破墨初布袖蛟龍蟠壯觀駭心魄萬象本自閒  
寒齋靜相對遠意空追攀

中秋

王中立

素丸東溟來飛上玻璃盆聊揮五輪手撥去萬里陰印透山河影  
照開天地心人世有昏曉我未嘗古今

三門津

王渥

層崖摩蒼穹四月號陰風大河三門險神禹萬世功他山亦崔嵬



砥柱獨尊雄雷霆日鬪擊悍暴愁天公劉侯智有餘始令舟楫通  
仍餘石上穴飛棧曾連空遙瞻白玉枝挺植丹竈中仙公去不返  
此事真冥蒙夫人與鼓崖怪幻尤難窮獨喜兵火餘巋然出新宮  
當時疏鑿意四海要會同誰知千歲後築壘防嘯兇詩成一大笑  
浩浩洪波東

拳秀峰

秦略

平滑石之俗其俗資磨礪磊醜石之秀其秀在醜中正如古丈夫  
貌寢氣質雄又如聖人心孔竅虛明通大都一拳許含蓄華與嵩  
大巧本若拙足見造化功好處元更多摹寫不易工君其善調護  
抵擊防兒童

游五渡谷

劉昂霄

南山如碧環缺處蒼崖開當年造物手辦此何神哉睥睨倚天壁  
千古封莓苔源源萬斛泉飛出重山來白龍三百丈行處鳴春雷  
巨石若棟宇磊砢相推排跳波與濺沫餘怒猶喧阗我來值杪秋

萬壑風聲哀黃花雜紅樹錦繡紛巖隈奇勝夙所貪欲去仍裴徊  
題詩還自笑媿我非仙材

古意四首

雷瑄

美人傷獨宿窈窕春閨深素手卷翠被當牕調玉琴危絃奏苦調  
清歌抗哀音絃絕歌復咽起作薄命吟妾如朱槿花含英愁晏陰  
郎如青銅鏡照面不照心不怨不照心但惜飛光沈且留連理枕  
莫捲合歡衾儻君回餘輝歡盟尙可尋

對酒不能飲拊劍自度曲一唱行路難歌與淚相續朝爲楊朱泣  
莫爲阮籍哭古道盡荆棘新蹊苦蕢菘曲行違吾心直行傷我足  
曲直無適從昂頭羨鴻鵠

絲絲兔絲草濯濯檉樹枝結根偶相值引蔓纏絲之春風一披拂  
柯葉含榮滋弱質附美蔭百齡誓不違清商忽用事霜飈已淒  
豈意百尺條同此寸草萎委蔓失所託憔悴徒傷悲知君無歲寒  
何用相因依



賢王悲墜履賢婦念遺簪重在不志故微物何所欽嗟我昔遊友  
雲路揚徽音詎念宿昔好棄擲各飛沈昔如膠投漆今如辰與參  
桃李雖成蹊諒無松柏心

緱山置酒 同內翰馬文叔獻雷兄  
希顏賦詩分韻得實字

元好問

靈宮肅清曉細栢含古春人言王子喬鶴馭此上賓白雲山蒼蒼  
平田木欣欣登高覽元化浩蕩融心神西望洛陽城大路通平津  
行人細如蟻擾擾爭紅塵蓬萊風濤深鬢毛日夜新殷勤一杯酒  
媿爾雲間人

穎亭留別 同李治仁卿張肅子敬王  
元亮子正分韻得畫字

元好問

故人重分攜臨流駐歸駕乾坤展清眺萬景若相借北風三日雪  
太素秉元化九山鬱崢嶸了不受陵跨寒波淡淡起白鳥悠悠下  
懷歸人自急物態本閑暇壺觴負吟嘯塵土足悲咤迴首亭中人  
平林澹如畫

元魯縣琴臺

元好問

荒城草木合破屋風雨侵千年一琴臺睠焉涕盈襟遺愛食縣社  
公寧不堪任此臺卽甘棠忍使無餘陰旁舍高以華大豪日捐金  
蒼雲玄武暮鬼物憑陰岑尙德抑玄虛墜典誰當尋我與薦寒泉  
百拜公來臨公來不能知落日下饑禽懷哉空山裏鶴飛猿與吟  
當年于薦歌補袞一何深承平示得意獨能正哇淫君相此一時  
又復悟良箴諛臣坐廢黜盍亦起幽沈蒲輪竟頽轂香草空深林  
寂寞授書室孤甥舉遺衾生平諒已然薄俗矧來今千山爲公臺  
萬籟爲公琴夔曠不竝世月露爲知音人間蹄涔耳已矣非公心  
元道州文編以元魯山爲元魯  
縣又臺今爲玄武祠故及之

龍門雜詩二首

元好問

石樓繞清伊塵土天所限人言無僧久草滿不復剡灘聲激悲壯  
山意出高蹇當年香山老掛冠遂忘返高情留詩軸清話入禪版  
誰言海山去蕭散仍在眼溪寒不可涉倚杖西林晚  
不見木庵師胸中滿泥塵西牕一握手大笑傾冠巾青山有佳招



一游負因循老筇動高興萬景森前陳乾元先有期清伊亦知津  
細看潛溪樹高臥香山雲學詩二十年鈍筆死不神乞靈白少傳  
佳句儻能新遙遙洛陽城梅花千樹春山中有忙事寄謝城中人

乙酉六月十一日雨

元好問

一旱近兩月河洛東連淮驕陽佐大火南風捲黃埃草樹青欲乾  
四望令人哀時時怪事發雨雹如李梅我夢天河翻崩騰走雲雷  
今日復何日駛雨東南來元氣淋漓中焦卷意已回良苗與新穎  
鬱鬱無邊涯書生如老農苦樂與之偕閭閻吉語一笑心顏開  
酉年酒如漿乾溢安能災唯當作高廩多具尊與鬯家人笑問我  
君田安在哉音見魏志

觀浙江漲水在鄆陽

元好問

一早千里赤一雨垣屋敗浙故以江名暴與眾壑會初驚沙石捲  
稍覺川谷隘雷風入先驅大塊供一噫千帆鼓前浪萬馬接後派  
崩崖不暇顧拔木無留礙憑陵如藉勢洄洑各有態平分乍舒徐

怒觸忽碎壞雲蒸楚樹杪雪映商嶺背髯千丈潮悅與海門對  
飲飛鬪蛟鱷燃犀出鱗介陽侯富陰族萬首露光怪翠蕤澹偃蹇  
鉦鼓亂砲磕永懷疏鑿力重歎神禹大乾坤海爲壑未礙變橫潰  
納汗非無處流惡聊自快投詩與龍盟滌蕩煩一再時拜大赦五日矣

五松平見目說

元好問

竹港晨露白石門秋氣寒湍流落澗壑細路深茅菅江平白石出  
竟日沿清灣四顧不見人山鳥時間關蒼崖入地底煙靄青漫漫  
力盡不能過卻坐空長嘆青天白雲閑可望不可攀虛名竟何得  
行路乃爾難

贈答楊煥然

元好問

詩亡又已久雅道不復陳人人握和璧燕石誰當分關中楊夫子  
高誨世所聞十年玄尚白藜藿甘長貧有來河水篇四海付斯文  
斯文有定在桓生知子雲古來知己難萬里猶比鄰千人國中和  
要非心所親東楚西南秦望君勞我神相逢不得語別去徒殷勤



白雲不可贈相思秋復春

曉發石門渡湍水道中

水經湍音專

元好問

疎星澹秋明陰霞絢朝映積雨成坐愁晨光動幽興石門歸馭引  
湍浦漁刀竝曠蕩萬景新歸藏四山靜平湖風漪綠遠岸秋沙淨  
洋洋游鯨逝汎汎輕鷗泳隱顯乖夙心感寓見真性倦遊時自悼  
違已將安竟憂端從中來茫茫發孤詠

學東坡移居八首

元好問

廢地三畝餘十年長蒿萊瓦礫雜糞壤白骨深蒼苔孤客無所投  
卽此營茅齋壑斷豈不苦寢處亦可懷辱身賤者事寧當惜筋骸  
伐木荒林中運甕古城隈辛勤八十日吾事乃得諧買宅必萬錢  
一錢不天來今晨見此屋一笑心顏開

誰謂我屋寬寢處無復餘誰謂我屋小十口得安居南榮坐諸郎  
課誦所依於西除著僮僕休休得自如老我於其間兀兀窮朝晡  
起立足欠伸偃臥可展舒牕明火焙煖似欲忘囚拘屋前有隙地

客舍不可無花欄及菜圃次第當耘鋤東野載家具家具少於車  
我貧不全貧尙有百本書

故書堆滿床故物貯滿箱渾渾商寶高纍纍漢銅章杖飾昭敬恭  
嚴卯訶痺剛雷文繞杖節獸面出佩瑛私印刻王尊玉斗蛟龍翔  
逸少留半紙魚網非硬黃亦有墨首帖不辦作鴈行雪景睿思物  
宣政舊所藏晉公古漁父浩歌濯滄浪因觀宮騎圖臥馳識提囊  
谿石含餘潤奚墨凝幽香南榮桂風響雲裾珮鏘鏘鏡背先秦書  
八字環中央讀之三嘆息此日何時光

壬辰困重圍金粟論升勺明年出青城瞑目就束縛毫釐脫鬼手  
攘臂留空囊聊城千里外狼狽何所託諸公頗相念餘粒分鳧鶴  
得損不相償坏土填巨壑一冬不製衣繒纊如紙薄一日僅兩食  
強半雜藜藿不羞蓬纍行粗識瓢飲樂敵貧如敵寇自信頗相慤  
兒啼飯籬空堅陣爲屢卻滄溟浮一葉渺不見止泊五窮果何神  
爲戲乃爾虐



舊隱嵩山陽筭蕨豐餽新齋浙江曲山水窮放浪乾坤兩茅舍  
氣壓華屋上一從陵谷變歸顧無復望樵漁憶還往風土夢閑曠  
况如悟前身姓改心不忘去年住佛屋盡室寄尋丈今年僦民居  
臥榻礙盆盎靜言尋禍本正坐一出妄青山不能隱俛首入羈鞅  
巢傾踰隨覆身在顏亦強空悲龍髯絕永負魚腹葬置錐良有餘  
終身志懲創

國史經喪亂天幸有所歸但恨後十年時事無人知廢興屬之天  
事豈盡乖違傳聞入讎敵祇以興罵譏老臣與存亡高賢死兵飢  
身死名亦滅義士為傷悲哀淮南城萬夫甘伏尸田橫巨擘耳  
猶為談者資我作南冠錄一語不敢私稗官雜家流國風賤婦詩  
成書有作者起本良在茲朝我何所營暮我何所思胸中有茹噎  
欲得快吐之濕薪煙滿眼破鏡冰生髭造物留此筆吾貧復何辭  
東坡謫黃州符藥行江湖荒田拾瓦礫賤役分僮奴我讀移居篇  
感極為悲獻九原如可作從公把犁鋤我貧公亦貧賦分無賢愚

論人雖甚媿詩亦豈不如

此州多寓士論年悉肩隨風波同一舟奚必骨肉為倪家蓮華白  
每釀必見貽季昌妙琴事足以相娛嬉郭侯家多書篇帙得徧窺  
趙子篤於學閒以問所疑王生舊舍鄰窮達心不移千里訪存歿  
十口分寒飢獨有伸通甫天馬不可羈直以論詩文稍稍窺藩籬  
永懷王與李朔漠行當歸書來聞吉語報我脫紮維慚非一狐腋  
不直五羖皮我作野史亭日與諸君期相從一笑樂來事無庸知

梨花海棠二首

元好問

梨花如靜女寂寞出春暮春工惜天真玉頰洗風露素月澹相映  
蕭然見風度恨無塵外人為續雪香句孤芳忌太潔莫遣凡卉妬  
妍花紅粉妝意態工媚嫵窈窕春風前霞衣欲輕舉金槃渺華屋  
國豔徒自許依依如有意脉脉不得語詩人太冷落愁絕殘春雨

宿張靖田家

地屬壽陽

元好問

川涂盡坡陀嶺路人荒梗微茫望煙火向背得廬井殘民安朴陋



倦客喜幽屏兒童聞扣扉租吏有餘警兩崖紛蕞薄砂石立頑獷  
湍流落空嵌百折不爲騁山深饒風露夜氣淒以耿園花澹相望  
邊月空照影深居苦不早素髮忽垂領誰謂林野人茲焉惜清景

同白兄賦瓶中玉簪

元好問

畏景眾芳歇仙葩此夷猶冰姿出新沐娟娟倚清秋昨夢今見之  
風鬟玉搔頭誰言閨房秀高情渺林邱碧筵古銅壺一室香四周  
懷人成獨詠遠思徒悠悠

別李周卿三首

元好問

行路澀於棘單車望千山歌君歸雲曲清涕留餘潛六年河朔州  
動輒得謗訕唯君篤高義日日來柴關古交松栢心今交桃李顏  
古人去不返古道挽不還相思一樽酒幽恨寄山閒  
風雅久不作日覺元氣死詩中柱天手功自斷鰲始古詩十九首  
建安六七子中間陶與謝下逮韋柳止詩人玉爲骨往往墮塵滓  
衣冠語俳優正如作婢使望君清廟瑟一洗箏笛耳

城居日蛙黽局促復局促去作山中客放浪誰檢束溪光淡於冰  
山骨淨如玉懷我同心人團茅住深竹垂綸鮮可食種秫酒亦足  
石壇三萬丈醉眼天一粟安得萬里風相從兩黃鵠

九日讀書山中三首

元好問

行帳適南下居人踟庭戶城中望青山一水不易渡今朝川涂靜  
偶得展衰步蕩如脫囚拘廣莫開四顧半生無根著筋力疲世故  
大似丁令威歸來歎墟墓鄉閭喪亂久觸目異平素粉榆雖尙存  
歲晏多霜露

宇宙有此山閱世過烏疾何人不此遊名姓寧復識茲辰世所重  
前代多盛集柴桑有故事二謝留俊筆併數孟與桓此外誰記憶  
人生百年內踏地皆陳跡獨惟我輩人興懷念今昔山林與臯壤  
自古長太息

我在正大初作吏浙江邊山城官事少日放浙江船菊潭秋花滿  
紫稻釀寒泉甘腴入小苦幽光出清妍歸路踏月明醉袖風翩翩



父老遮我留謂我欲登仙一別半山亭回首十餘年江山不可越  
目斷西南天

元裕之以山游見招兼以詩四首爲寄因以山中之意仍其

韻

麻九疇

石華政可採負我孤舟蓬胡爲紅塵裏擾擾槐安宮山閒綠蘿月  
一照千巖空洪崖去不返清游誰與同空餘松根泉雜佩流無窮  
人心墮泥滓不如與天通舉頭視霄漢浩露洗心胸  
日月兩角蝸天地一粒粟老盆可徑醉豈擇瓦與玉大笑區中人  
朱門丐梁肉清曉登少室日夕眺王屋紫煙晞吾髮碧霞貯我腹  
溪中有白雲萬事付濯足物物愜幽情不獨蘭與菊  
南風入桂樹高葉碧崢嶸舉手戲攀折上與雲煙撐黃金閒白玉  
遍地先晶熒笙簫坐閒發鸞鶴空中鳴浩歌山谷應起舞衣裳輕  
一尊石上酒如我浩氣盈目送飛鴻盡青雲萬里平  
國風久已熄如火不再然流爲玉臺詠鉛粉嬌華年政須洗妖冶

八駿踏芝田青苔明月露碧樹涼風天塵土一一盡象緯昭昭懸  
寂寥抱玉辨爭競搖尾憐幸有元公子不爲常語牽

西山避亂三首

王元粹

蒼山多回互四望令人迷過午日已暖殘雪融爲泥路滑不可進  
弱葛愁攀躋老幼委溝壑不如犬與雞嗷嗷同行子手中各有攜  
汲澗爲飲食架木爲巖栖夜半三四驚翁媪禁兒啼念我長病母  
亂離隔東西

野宿不得曉飛霜沾敝袍空山凝寒色天邊星月高憶昨離鄂城  
數家同遁逃穿林恐相失前後聞呼號避亂但欲遠焉知登頓勞  
俯臨萬仞壑性命輕鴻毛

青青道邊麥知是誰家田山田固已薄榛石復相連旁有破茅屋  
日入不見煙借問舊居者聞亂已西遷平生苦淪薄對此增慨然  
甲兵暗宇宙誰能安一廛愁憂無從訴仰面視蒼天伐木南澗底  
雙鹿過我前



置酒半山亭得秋字

麻革

懷抱久不寫兀坐如繫囚永懷西山勝浩蕩成茲遊巖壑互窈窕  
叢蘿鬱深幽飛煙入虛無長風跨崑邱楚甸散林莽商顏亦綢繆  
雷雨天地空景物入夜浮況當節律變萬物颯以秋雲來白日慘  
天澹清江流西望渺關河沈沈生暮愁蘭苕暗幽谷菱荷老芳洲  
一笑舉酒觴浩歌聊自酬幽賞興未極慨嘆心悠悠世事蒼茫外  
寒沙明白鷗

題梁氏靜樂堂

段成已

攘攘區中人役心名與利於身竟何有乾沒不少置叔敬有耳孫  
犖犖與時異一官不肯覓閒居養高志築室塵境中中有塵外意  
方其厭囂湫歸來行少墜牀頭一卷書淨洗紛華累苟能樂其樂  
寧復事吾事見客不吝情有酒即成醉為問東華塵何如北牕睡  
清風吹我懷萬事覺無味誰知方寸閒自有清涼地

陳子正容安堂

○堂目  
作室

段成已

陳子少英邁逸氣不可挫典刑肖乃翁出語輒驚座行止非所能  
造物聽掀簸功名鷹在韝歲月蟻旋磨區區一邑中十載供史課  
結廬慕淵明志向有許大淡墨寫形似終日相對坐一室足我容  
百念付慵惰青山隱檐楹流水出其左植花數十叢種竹千百个  
事來若機張事去如甌墮浩然方寸閒不受塵一沓豈無二仲賢  
閒暇日相過有酒相獻酬有詩互賡和溪山入笑裏珠玉霏咳唾  
徜徉天地間一物莫非我醉來語更真卿去我將臥主人正高枕  
山鳥莫啼破

傷別曲

王鬱

蘭臯飛暗塵征車紆去轍長安雖咫尺回首繁華歇故人亭下酒  
蛾眉眼中血平生慷慨腸忽作柔絲結傳聞紫塞傍秋烽下危堞  
班超未投筆來瑱空嚼鐵誰能金閨中坐眷娟娟月

送侯道士

張璪

十年走南北黃塵汗人衣翩翩夜啼鳥一枝無可依問君何所如



金文雅卷二  
鳧鳥東南飛恨我不得往失脚穿與機從君知不能一笑人間非  
何水無蒲魚何山無蕨薇終當拂衣去往叩雲山扉

金文雅卷二

金文雅卷三目錄

七言古詩

古劍行

宇文虛中

晚夏驛騎再之涼陘觀獵山閒往來十有五日因書成詩

蔡松年

春愁曲

高士談

醫巫閭

蔡珪

黃彌守畫吳江新霽圖

党懷英

金山

党懷英

題春雲出谷圖

党懷英

徐茂宗蝸舍

党懷英

修城行

劉迎

河防行

劉迎

樓前曲

劉迎



車輓轆

劉迎

沙漫漫

劉迎

敗車行

劉迎

郭熙秋山平遠用東坡韻

趙迎

西城觀水

劉昂

都門觀別

王礪

暮春郭南

蕭貢

漢歌

蕭貢

中秋對月

趙秉文

游華山寄元裕之

龐鑄

山谷透絹帖

馮延登

鄜城道中

李純甫

怪松謠 雪後

李俊民

姚子昂畫馬

掃晴婦

李俊民

沁源道中

王特起

修城去

趙元

送王生西游

完顏璠

京叔將拜婦于陳徵言為贈老嬾廢學茫無所得獨記其與

屏山雲卿襟期所在者非以為詩也

雷淵

送德温同舍赴簾試

元德明

桃源行

元德明

贈王飛伯雜言

李獻能

天門引

元好問

湘夫人詠

元好問

孤劍詠

元好問

南冠行

元好問

黃金行

元好問



并州少年行

元好問

范寬秦川圖

元好問

寄答溪南詩老辛愿敬之

元好問

聞欽叔在華下

元好問

游黃華山

元好問

高門關

元好問

送李參軍北上

元好問

汎舟大明湖

元好問

湧金亭示同游諸君

元好問

馮子達扇頭

元好問

游龍山

元好問

幽蘭

元好問

古月一篇為裕之賦

李汾

賦伯玉透光鏡

麻九疇

竹瘦冠為李道士賦

麻九疇

夏日

麻九疇

跋伯玉命簡之臨米元章楚山圖

麻九疇

長門怨

杜仁傑

長安行

李獻甫

秋風怨

李獻甫



金文雅卷三

秀水莊仲方編

七言古詩

古劍行

宇文虛中

公家祖皇提三尺素靈中斷開王迹自從武庫衝屋飛化作文星  
 照東壁夫君安得此龍泉秋水湛湛浮青天夔魑奔喘禺强護中  
 夜躍出光蜿蜒挂頤欄具男兒飾彈鋏長歌氣填臆嶙峋折檻霽  
 天威將軍拜伏奸臣泣龍泉爾莫矜雄鉞不見烏盡良弓藏會當  
 鑄汝為農器一劍不如書數行

晚夏驛騎再之涼陘觀獵山間往來十有五日因書成詩

蔡松年

兜羅惹鬱浮空青曉日馬頭雙眼明名山不作世俗態千里傾蓋  
 來相迎老松閱世幾千尺玉骨冷風戰天碧應笑年年空往來塵  
 土勞生種陳迹山回晚宿一川花翦金裁碧明煙沙寒香絕豔自



開落欲慰寂寞無流霞明日行營獵山麓古樹寒泉更深綠強臨  
冰玉照鬢毛只恐山靈怪我俗陂湖不盡水如天清波白鷗自在  
眠平時朝市手遮日思把一竿呼釣船驛騎回時山更好過雨秋  
容淨如掃山英知我宦遊心爲出清光慰枯槁可憐歲月易侵尋  
慙愧山川知我心一行作吏豈得已歸意久在西山岑他年俗累  
麤能畢雲水一區供老佚舉杯西北酌山川爲道此言吾不食

春愁曲

高士談

壓花曉露萬珠冷金井呶啞轉纖綆寶階寂寂苔紋深東風搖碎  
湘簾影芙蓉帳暖春眠重窗外啼鶯喚新夢推枕起來嬌翠翠一  
線沈煙困金鳳游絲飛絮俱悠颺慵倚繡牀春晝長郎馬不嘶芳  
草暗半篩急雨飛橫塘

警巫閭

蔡珪

幽州北鎮高且雄倚天萬仞蟠天東祖龍力驅不肯去至今鞭血  
餘殷紅崩崖暗谷森雲樹蕭寺門橫入山路誰道營邱筆有神只

得峰巒兩三處我方萬里來天涯坡陀繚繞昏風沙直教眼界增  
明秀好在嵐光日夕佳封龍山邊生處樂此山之間亦不惡他年  
南北兩生涯不妨世有揚州鶴

黃彌守畫吳江新霽圖

党懷英

江雲捲宿雨江風散晨煙山光煙雨潤欲滴影墮江水空明間修  
蛾新妝翠連娟下拂塵鏡窺明蠲漁舟來何許觸破青茫然中流  
水肥魚逆上受網應有松鱸鮮借問張季鷹西風幾時還漁郎理  
網喚不應但見水碧江涵天如何塵埃中眼界有許寬道人胸次  
陂萬頃爲寫此境清而妍蒼崖無塵樹影寒直欲坐我苔磯邊我  
家竹溪陰小艇橫清漣異時赤腳踏兩舷不應尙作披圖看

金山

党懷英

我從渡淮涉高郵雪風連日吹行舟維揚地西闔月色星月隱見  
邊城樓晴光破曉射瓜步照耀玉宇開瓊洲馮夷收威浪安帖容  
我一到金山頭金山勝概冠吳楚萬礎蟠峙江中流平生夢寐不



到處乃以王事從私遊鍾山雨花落眼底海門鶴崖波際浮川開  
林闔望不極但見遠色明輕鷗風煙渺滌異吾土行役有程難久  
留一杯未舉帆影轉已看浙樹梢旗旒

題春雲出谷圖

党懷英

春雲乍出山有無春雲已去春山孤山光空濛不可寫正要雲氣  
相縈紆山吞雲吐變明晦半與崑谷生朝晡輕林蕭蕭暗溪樹餘  
影漠漠開樵居舟人艤棹並沙尾坐看縹緲搖空虛巧分天趣出  
畫外韻遠不與丹青俱今人重古不知畫但愛屋漏煙煤汗惜哉  
東坡不及見此本詩中獨有疊嶂煙江圖

徐茂宗蝸舍

党懷英

萬生擾擾安其安鸞鳩不羨鵬飛搏端知扶搖上九萬無異跳躍  
蓬蒿間是身江海一漂粟身外紛然皆外物一塵儻可容所寓何  
用渠渠作高屋知君從道由心成昔焉忘俗今忘形物來弭角不  
知競觸蠻血戰良虛名我夢敲門訪君舍舍小不容相對話覺來

驚見壁間蝸俯仰人間真物化

修城行

劉迎

淮安城郭真虛設父老年前向予說築時但用雞糞土風雨即摧  
乾更裂祇今高低如堵牆舉頭四野青茫茫不知地勢實衝要東  
連鄂渚西襄陽誰能一勞謀永逸四壁依前護磚石免令三歲二  
歲間費盡千人萬人力

唐州後竟用此策也

河防行

劉迎

南州一雨六十日所至川源皆汎溢黃河適及秋水時夜來決破  
陳河堤河神憑陵雨師借晚未及晴昏復下傳聞一百五十村蕩  
盡田園及廬舍我聞禹時播河爲九河一河旣滿還之他川平地  
迴勢隨弱安流是以無驚波祇今茫茫餘故迹未易區區議疏闢  
三山橋壞勢益南所過泥沙若山積大梁今世爲陪京財賦百萬  
資甲兵高談泥古不須爾且要築堤三百里鄭爲頭汴爲尾準備  
他時漲河水



樓前曲

劉迎

樓前山色秋橫碧樓下水光秋漫白眼看對此千里愁樓下長歌  
古離別蕭蕭郎馬何時歸鴈奴去作斜行飛灞橋過客夕陽遠渭  
城行人朝雨微玉淒花冷令人瘦日暮倚樓雙翠袖蕙炷猶殘鷓  
鴒香麴塵半著鴛鴦繡五雲飛過芙蓉城洞天冷落雲間笙妾身  
有願化春草伴君長亭仍短亭

車輶輓

劉迎

馬虺隤牛轂躑山行縈紆車輶輓路旁指點是官人老矣一翁雙  
鬢秃汝牛幸可耕汝馬幸可騎有此可載琴書歸胡為奔走東西  
道白髮刁騷被人笑

沙漫漫

劉迎

沙漫漫草班班南山北山相對看我行乃在山之間行人仰不見  
飛鳥樹木足知邊塞少沙漫漫草班班我行欲趁西風還僕夫汝  
莫愁衣單我但著衣思汝寒

敗車行

劉迎

前車行後車逐車聲夜隨山詰曲前車失手落高崖車輪直下聲  
如雷同行急救救不得人牛翻壓鳴聲哀我時潛聞後車說前車  
使牛何太拙只知拍手笑前人不道後來當改轍前途猶有坡陀  
在後車當以前車戒

郭熙秋山平遠用東坡韻

劉迎

槐花忙過舉子閒舊遊憶在夷門山玉堂會見郭熙畫拂拭縑素  
塵埃間楚天極目江天遠楓林渡頭秋思晚煙中一葉認扁舟雨  
外數峰橫翠巘淮安客宦踰三霜雲夢澤連襄漢陽平生獨不見  
寫本慣飲山綠滄湖光老來思歸眞日日夢想林泉對華髮丹青  
安得此一流畫我橫筇水中石

西城觀水

趙風

西山秋水來天地巨野橫流浩無際長風蹙浪鱗甲生雨角斜分  
半山際繚堤北去接飛橋鼓鼙洶洶翻驚濤中流突兀玉山起直



疑河伯驅靈鼇冷光搖蕩秋雲白渾似夢中游震澤隔林我欲喚  
漁郎孤帆忽如過鳥翼安得酒船常拍浮四時甘味置兩頭何人  
與我同此樂潁陽試覓元丹邱

都門觀別

劉昂

買酒消閒愁剪刀翦流水閒愁不可消流水無窮已悠悠窗下斷  
腸波總是行人墮淚多門外馬嘶思遠道小頓猶唱渭城歌歌聲  
未斷征鞍發望斷垂楊人影滅斜陽照影卻歸來兩地相望今夜  
月閱人多矣主人翁離別都歸一笑中陌上行人終不悟年年楊  
柳怨東風

莫春郭南

王礪

大梁城外孤臺傍煙昏水碧春林芳憑高極目見歸鴈風物令人  
思故鄉紫金山下斜陽莫萬里川光照雲樹山間細雨花落時何  
人來往東風路

漢歌

蕭貢

華陰雙璧傳山鬼報道明年祖龍死草間豪傑伺天時攘袖撫衿  
爭欲起藪祠篝火妖狐語夥涉爲王張大楚南公舊有三戶謠東  
井新看五星聚中原茫茫走秦鹿天遣沛公興白屋大蛇斬斷素  
靈號蚩尤祭罷朱旗蠹竭來扶義入關中恩結人心帝道隆秦法  
煩苛猶一洗項王慄悍何勞攻三傑相須立人紀四老仍來安太  
子已令陸賈說詩書更詔孫通制儀禮阿翁著手規摹遠獨恨兒  
孫讀城旦王純霸雜寧不知不是不知知已晚

中秋對月

蕭貢

去年中秋客神京露坐舉杯邀月明今年還對去年月北風黃草  
遼西城年年月色長清好只有悲秋人已老兒童不解憶長安歌  
舞團圍遶翁媪人生宦游真可憐不知何處度明年預愁老罷廢  
詩酒負此冰玉秋嬋娟我生萬事隨緣耳居自無憂行亦喜君不  
見杜子閨中只獨看鄜州寂寞千山裏

游華山寄元裕之

趙秉文



我從秦川來遍歷終南游莫行華陰道清快明雙眸東風一夜橫  
作惡塵埃咫尺迷崑幽山神戲人亦薄相一杯未盡陰靈收但見  
兩崖巨壁插劍戟流泉夾道鳴琳瑯希夷石室綠蘿合金仙鶴駕  
空悠悠石門畫斷一峰出婆娑石上爲遲留上方可望不可到崖  
傾路絕令人愁十盤九折羊角上青柯坪上得少休三峰壁立五  
千仞其下無址傍無儔巨靈仙掌在霄漢銀河飛下青雲頭或云  
奇勝在高頂腳力未易供冥搜蒼龍嶺瘦苔蘚滑嵌空石磴誰雕  
鏤每憐風自四山而下不見底惟聞松聲萬壑寒颼颼捫參歷井  
到絕頂下視塵世區中囚酒酣蒼茫瞰無際塊視五岳芥九州南  
望漢中山碧玉簪亂抽况復秦宮與漢闕飄然聚散風中漚上有  
明星玉女之洞天二十八宿環且周又有千歲之玉蓮花開十丈  
藕如舟五鬣不朽之長松流膏入地盤蛟蚪采根食實可羽化方  
瞳綠髮三千秋時聞笙簫明月夜芝輶羽蓋來瀛洲乾坤不老青  
山色日月萬古無停轉君且爲我挽回六龍轡我亦爲君倒卻萬

河流終朝汗漫游八極乘風更覓元丹邱

山谷透絹帖

龐鑄

君不見李廣射虎如射兔霹靂一聲石飲羽又不見巨靈擘山如  
擘雲蓮華萬仞留掌痕精神入物物乃爾筆端有神亦如此熙豐  
以來推善書日下無雙黃太史胸中八法蟠虹霓眉仙人容並  
馳平生敗筆塚纍纍妙處不減磨崖碑呂侯好古兼好異與字分  
身作游戲清潭錯落印星壁大澤縱橫散龍蛻又如漢宮粉黛爭  
嬋娟倚風顧影影更妍豈無硬黃官紙與臨做畫師寫照非天然  
呂侯之子今詩仙傳家以此爲青氈須防神物有時合卻逐六丁  
飛上天

鄆城道中

馮延登

北風慘澹揚沙塵鄆西三日無行人十村九村雞犬靜高田下田  
狐兔馴昨朝屏息過溪口知有白額藏深榛赤子弄兵更可惻路  
旁僵尸衣血新野叟偃僕行拾薪欲語碎易如驚麋瘦梅疎竹未



慰眼只有清淚沾衣巾

怪松謠

李純甫

阿誰栽汝來幾時輪困擁腫蒼虬姿鱗皴百怪雄牙髭擎空天矯  
蟠枯枝疑是秘魔巖中老慵物旱火燒天鞭不出睡中失卻照海  
珠羞入黃泉蛻其骨石錯沙錮汗且僵埋頭臥角政摧藏試與摩  
挲定何似怒我根觸鬚張壯士囚縛不得住神物世間無著處  
隄防夜半雷破山尾血淋漓飛卻去

雪後

李純甫

玉環暈月蟠長虹飛沙卷土號陰風黃雲冪冪翳晴空屋頭唧唧  
鳴寒蟲天符夜下扶桑宮元冥震怒鞭魚龍魚龍飛出滄海底咄  
嗟如律愁神工急剋北斗捲雲漢凌澌捲入天瓢中椎瑋碎璧紛  
破碎六花翦出寒瓏翹翹作穗大如手千奇萬巧難形容恍如  
墮我銀沙界清光綺夜寒腫臃肝腸作崇耿無寐試把往事閒追  
窮男兒生須銜枚卷甲臂瑠弓徑投虎穴策奇功不然羊羔酒漲

玻璃鍾侍兒醉臉潮春紅誰能蹇驢駝著灞陵東骨相寒酸愁煞  
儂屏山正吐黃齏氣笑倒坐間亡是公

姚子昂畫馬

李俊民

雄姿卓立開天骨騰踏萬里如神速可憐不遇九方臯空使時人  
指為鹿自從大奴守天育無由更騁追風足中原一戰收乾坤白  
髮將軍髀生肉

掃晴婦

李俊民

世俗為掃晴婦者蓋假變理之手導陰陽之和使民間免乾  
溢之患也感其事而賦之

卷袖褰裳手持帚挂向陰空便搖手前推後卻不辭勞欲動不動  
誰擊肘偶人相對木與土神女但勞朝復暮龍公不作本分事中  
間多少閒雲雨見說周人憂旱母寧知東海無冤婦慙勤更倩封  
家姨一時斷送龍回首

沁源道中

王特起



野夫不識武城宰問之無言色微改但說今年秋雨多黃菁滿谷  
無人采踏遍西城錦石盤莫投佛屋解征鞍隔林依約見燈火山  
谷人家初夜寒

修城去

甲戌歲忻城陷官復完治  
途中聞哀歎聲感而有作

趙元

修城去勞復勞途中哀歎聲嗷嗷幾年備外敵築城恐不高城高  
慮未固城外重三濠一鋏復一杵慙盡民脂膏脂膏盡猶不辭本  
期有難牢護之一朝敵至任摧擊外無強援中不支傾城十萬戶  
屠滅無移時敵兵出境已踰月風吹未乾城下血百死之餘能幾  
人鞭背驅行補城缺修城去相對泣一身赴役家無食城根運土  
到城頭補城殘缺終何益君不見得一李勤賢長城莫道世間無  
李勤

送王生西遊

飛伯

完顏鑄

紫陘仙人今淵雲騎風御氣七尺身丈夫恥與噲等伍故作野鶴  
昂雞羣往年書劍游梁日咳唾中間滿珠璧温子徒勞手八父蘇

老猶迷目五色慨然拂袖游嵩陽西南陌上書傳香仲宣堂堂舍  
我去舉杯卻愁愁更長去程相近黃花節三十六峰如玉列龍門  
楓葉墮紅綃洛浦蘆花舞晴雪勳名細事猶秋毫政可痛飲讀離  
騷天津月照紫綺裘綠嶺風吹青玉簫我無羽翼隨君起浩歌相  
送秋光裏憑高西望青茫茫落日無情下寒水

京叔將拜埽於陳徵言為贈老嬾廢學茫無所得獨記其與

屏山雲卿襟期所在者非以為詩也

雷淵

梁苑池塘生綠煙吹臺草色春芊芊故人幽局閉長眠氣概英英  
猶眼前陽春無力蘇重泉孝子感時涕泗漣匄歸埽淮陽阡徵  
子贈別意拳拳我自頑頓須人鑄安能視後輒子鞭姬情孔意星  
日懸幹旋萬化中持權斯文興喪實關天尋常墨客技藝然醫巫  
星厯相比肩何用雕琢空徂年即今海縣漫腥膻獨挽洙泗可洗  
滌迺公有志屏山賢二豪在日子牽連傷哉未售墳已顛老我欲  
種南山田子之兄弟其周旋事業絕勝空言傳



送德温同舍赴簾試

元德明

太常侍祠水蒼珮內相夜下金蓮燭皇家結網未曾疏亦有佳人在空谷一從唐賦變遼律仰視折楊猶雅曲雲臺勳業一青衫被髮操戈踵相屬筋疲力涸僅乃得墨水一升凡幾辱英雄俯首入穀中舉世悉然非子獨子家口眾親又老歲月旨甘須寸祿薦書聞說過南宮冷暖人間到僮僕我初與子偕計吏人後人前隨碌碌不慚齊客售鼓瑟頗為荆人悲獻玉一詩今日送君行萬里秋風看鴻鵠功名前路知不免雞黍後期良未卜錦標無用吃龍頭帛書且當傳鴈足

桃源行

元德明

山中三月山桃開紅霞爛漫無邊涯山家藏春藏不得落花流水人間來憶昔攜家竄巖谷秦人半向長城哭回頭塵土失咸陽繒弋徒勞羨鴻鵠冬裘夏葛存太樸小國寡民皆樂俗晝永垣籬雞犬閒春晴門巷桑榆綠漁郎偶到本無心仙境何緣得重尋今日

武陵圖上看唯見雲林深復深

贈王飛伯雜言

李獻能

東風吹客衣敗絮逐風飛曉雪沒寒薺無物充朝飢空篋嘖嘖號飢鼠饕蝻蠕蠕緣破袴人生豈是犬與雞終歲區區守門戶游說萬乘苦不早儀秦殆是穿窬盜六國印千金車滿眼榮華境中老孔子聘列國孟軻游齊梁能令千載後名與日月光男兒生世不虛生死恨身後無聲名不然鳴玉游紫京不然著書談六經九日可射天可補鞭笞百蠻作降虜離騷一篇亦不惡雄筆盤盤映千古君不見彩鳳翔丹霄一鳴應九韶寸雲起泰山霖雨滿人間丈夫窮達果在天安用兒女得志相歆羨失志相悲憐仰天大笑出門去四海今誰魯仲連

天門引

元好問

秦王深居不得近從破衡成欲誰信白頭游客困咸陽憔悴黃金百斤盡海中僊人黃鵠舉大笑人間爭腐鼠丈夫何意作蘇秦六



印才堪警兒女古來多爲虛名老不見阿房淨如埽千年虎豹守  
天門一日牛羊臥秋草

湘夫人詠

元好問

木蘭芙蓉滿芳洲白雲飛來北渚游千秋萬歲帝鄉遠雲來雲去  
空悠悠秋風秋月沅江渡汶上寒煙引輕素九疑山高猿夜啼竹  
枝無聲墮殘露

孤劍詠

元好問

鬱鬱重鬱鬱夜半長太息吟成孤劍詠門外山鬼泣清霜稜稜風  
入骨殘月耿耿燈映壁君不見一飢縛壯士僵臥時自惜黃鵠一  
舉摩蒼天誰念樊籠束修翼

南冠行

元好問

南冠纍纍渡河關畢逋頭白乃得還荒城雨多秋氣重頽垣破屋  
深茅菅漫漫長夜浩歌起清涕曉枕留餘潛曹侯少年出紉綺高  
門大屋垂楊裏諸房三十侍中郎獨守殘編北窗底王孫上客生

光輝竹花不實鴉雛飢絲桐切切解人語海雲喚得青鸞飛梁園  
三月花如霧臨錦芳華朝復暮阿京風調阿欽才暈碧裁紅須小  
杜長安張敞號眉嫵吳中周郎知曲誤香生春動一詩成瑞露靈  
芝滿窗戶魚龍吹浪三山沒萬里西風入華髮無人重典鷓鴣裘  
展轉空牀臥秋月寶鏡埋寒灰鬱鬱萬古不可開龍劍出地底青  
天白日驅雲雷層冰千里不可留離魂楚些招歸來生不願朝入  
省暮入臺願與竹林嵇阮同舉杯郎食猩猩唇妾食鯉魚尾不如  
孟光案頭一杯水黃河之水天上流何物可煮人間愁撐霆裂月  
不稱意更與倒翻鸚鵡洲安得酒船三萬斛與君轟醉太湖秋

黃金行

贈王飛伯

元好問

王郎少年詩境新氣象慘澹含古春筆頭仙語復鬼語只有溫李  
無他人天公著詩貧子身子曾不知乃自神人間不買詩名用一  
片青衫衡霍重兒貧女富母兩心何論同袍不同夢入門喚婦不  
下機淚子垢面兒啼飢君詩只有貧女謠何曾夢見金縷衣外家



翁媪日有語嫁女書生徒爾爲昆陽城下三更酒醉膽輪困插星  
斗一夕詩腸老蛟吼十尺長人墮車走斫頭不屈三萬言欲向何  
門復低首何人壽我黃金千使君破鏡飛上天

并州少年行

元好問

北風動地起天際浮雲多登高一長嘯六龍忽蹉跎我欲橫江鬪  
蛟鼉萬弩迸射陽侯波或當大獵燕趙間黃熊朱豹皆遮羅男兒  
萬馬隨搗訶朝發細柳暮朝那埽雲黑山布陽和歸來明堂見天  
子黃金橫帶冠峩峩人生只作張騫傅介子遠勝僵死空山阿君  
不見并州少年夜枕戈破屋耿耿天垂河欲眠不眠淚滂沱著鞭  
忽記劉越石拔劍起舞雞鳴歌東方未明兮奈夜何

范寬秦川圖

元好問

亂山如馬爭欲前細路起伏蛇蜿蜒秦川之圖范寬筆來從米家  
書畫船變化開闔天機全濃淡覆露清而妍雲興霞蔚幾千里著  
我如在峩嵒巔西山盤盤天與連九點盡得齊州烟浮雲未清白

日晚矯首四顧心茫然全秦天地一大物雷雨瀕洞龍頭軒因山  
分勢合水力眼底廓廓無齊燕我知寬也不辨此渠寧有筆如修  
椽紫髯落落西溪君長劍倚天冠切雲望之見之不可親元龍未  
除湖海氣李白豈是蓬蒿人愛君恨不識君早乃今得子胸中秦  
作詩一笑君應聞

寄答南溪詩老辛愿敬之

元好問

五年不喚溪南渡日夕心馳洛西路山中今日見君詩惆悵良辰  
又相誤龍蛇大澤變風景虎豹天門鬱煙霧丈夫不合把鉏犁青  
鬢無情忽衰素平泉漫作窮愁志笠澤休題自憐賦長安正有五  
侯鯖骭麟誰能作樓護青燈老屋深蓬蒿蝙蝠掠面莎雞號劍歌  
夜半激悲壯松風萬壑翻雲濤區區墓上曹征西我知慚愧王東  
皋人生只有一杯酒螟蛉螺贏安能豪

聞欽叔在華下

元好問

翰林仙人詩酒豪平生嵇阮參游邀山中草棘滿霜雪可惜渠家



宮錦袍聞君忍飢讀離騷思之不見心爲勞舉頭西望忽大笑太  
華落落長庚高

游黃華山

元好問

黃華水簾天下絕我初聞之雪溪翁丹霞翠壁高歡宮銀河下濯  
青芙蓉昨朝一游亦偶爾更覺摹寫難爲功是時節氣已三月山  
水赤立無春容湍聲洶洶轉絕壑雪氣凜凜隨陰風懸流千丈忽  
當眼芥蒂一洗平生胸雷公怒擊散飛雹日腳倒射垂長虹驪珠  
百斛供一瀉海藏翻倒愁龍公輕明圓轉不相礙變見融結誰爲  
雄歸來心魄爲動蕩曉夢月落春山空手中仙人九節杖每恨勝  
景不得窮攜壺重來巖下宿道人已約山櫻紅

高門關

元好問

高門關頭霜樹老細路千山萬山繞亂餘村落不見人霰雪霏霏  
暗清曉莘川百里如掌平閑田滿眼人得耕山中樹藝亦不惡誰  
遣多田知姓名許李申楊竟何得只今唯有石灘聲

送李參軍北上

元好問

五日過居庸十日渡桑乾受降城北幾千里出塞入塞沙漫漫古  
來丈夫淚不灑別離間今朝送君行清涕留餘潛生女莫作王明  
君一去紫臺空佩環生男莫作班定遠萬里馳書望玉關我知驥  
子墮地無齊燕我知鴻鵠意氣雲端草間尺鷃亦自樂扶搖直  
上何勞搏一衣敝緼袍一飯苜蓿盤歲時壽翁媪團圓有餘歡就  
令一朝便得八州督爭似綵衣起舞春欄斑去年洛陽人今年指  
天山地遠馬韉破霜重貂裘寒朔風浩浩來客子慘在顏扼胡嶺  
上一迴首未必君心如石頑君不見桓山烏乳哺不得須臾閑眾  
雛一朝散孤雌回顧聲悲酸寒鴈來時八九月白頭阿母望君還

汎舟大明湖

待杜子不至

元好問

長白山前繡江水展放荷花三十里青山水底山更佳一堆蒼煙  
收不起山從陽邱西來青一灣天公擲下半玉環大明湖上一杯  
酒昨日繡江眉睫間晚涼一棹東城渡水暗荷深若無路江妃不



惜水芝香狼藉秋風與秋露蘭襟鬱鬱散芳澤羅襪盈盈見微步  
晚晴一賦畫不成枉著風標誇白鷺我時驂鸞追散仙但見金支  
翠鞋相後先眼花耳熱不稱意高唱吳歌叩兩舷喚取樊川搖醉  
筆風流聊與付他年

湧金亭示同游諸君

元好問

太行元氣老不死上與左戒分山河有如巨鼇昂頭西入海突兀  
已過餘坡陀我從汾晉來山之面目腹背皆經過濟源盤谷非不  
佳煙景獨覺蘇門多湧金亭下百泉水海眼萬古留山阿瀾沸灤  
水源淵淪晉水波雲雷涵鬼神窟宅深蛟鼉水妃簸弄明月璣地  
藏發泄天不訶平湖油油碧於酒雲錦十里翻風荷我來適與風  
雨會世界三日漫兜羅山行不得山北望空長哦今朝一掃眾峰  
出千鬟萬髻高峩峩空青斷石壁微茫散煙蘿山陽十月未搖落  
翠蕤雲旖相盪摩雲煙故爲出濃淡魚鳥似欲留婆娑石間仙人  
迹石爛迹不磨仙人去不返六龍忽蹉跎江山如此不一醉拊掌

笑煞孫公和長安城頭烏尾訛并州少年夜枕戈舉杯爲問謝安  
石蒼生今亦如卿何元子樂矣君其歌

馮子達扇頭

元好問

溪光冷於冰山骨淨如玉白雲自老人自閒莫遣秋風破茅屋

游龍山

元好問

曩子魏大梁得交此州雷與劉自聞兩公誇南山每恨南海北海  
風馬牛老龍面目今日始一見更信造物工雕鏤是時山雨晴平  
田綠油油並山涼氣多況得通深幽山泉谷口出迎客石罅戛擊  
琳琅球蜿蜒入微行漸覺藤蘿宵衣樹打頭惡木拉颯樓直幹比  
指稠石門無風白日靜自是林響寒颼颼一峰忽當眼仰看看不  
休一峰一峰百千峰雖欲一一顧揖知無由金城偃蹇不得上瑤  
臺回合如相留苔花萬錦石丹碧爛不收天關守虎豹武庫開戈  
矛小山隨起隨偃仆獨立千仞絕頂縹緲之飛樓百花岡頭藉草  
坐瀟灑正值金蓮秋亭亭妙高臺玉斧何時修登高攬玄化快如



鷹脫鞬山靈故爲作開合巧與詩境供冥搜白雲何許來纖絲弄  
輕柔蓬蓬作霧湧飄飄與煙浮玉衣仙人鞭素虬翕忽變化令人  
愁須與視六合浩蕩不可求初疑陶輪比運甕今悟夜壑眞藏舟  
劫石拂未窮祀國浪自憂斷鼇立極萬萬古爭遣起滅如浮漚快  
哉萬里風一掃天四周誰言太始再開闢日馭本自無停軻舉手  
謝山靈就無清涼毫相非神羞賤子貪山名客刺已屢投黃華挂  
鏡臺天壇避秦溝太山神明觀二室汗漫游胸中隱然後有此大  
物便可揮斥八極隘九州玉峰有佳招絕唱須一酬爲君探囊擲  
下珊瑚鉤白雲相望空悠悠異時華表見老鶴姓字莫忘元丹邱

幽蘭

元好問

仙人來從舜九疑辛夷爲車桂作旂疏麻導前杜若隨披猖芙蓉  
散江籬南山之陽草木腓澗岡重復人迹希蒼崖出泉懸素霓翛  
然獨立風吹衣問何爲來有所期歲云暮兮胡不歸鈞天帝居清  
且夷瑶林玉樹生光輝自棄中野誰當知霰雪慘慘清入肌寸根

如山不可移雙麋不返夷叔飢飲芳食菲尚庶幾西山高高空蕨  
薇露繁無人薦湘纍山鬼切切雲間悲空山月出夜景微時有彩  
鳳來雙棲

古月一篇爲裕之賦

李汾

古月天不收敵君三萬秋天孫弄明鏡光湧雲間流憶昔放逐江  
南州金陵女兒歌權謳草裏烏紗巾散著紫綺裘酒酣把玉笛直  
欲捫參厯并騎斗牛醉中呼兒搖雙舟吾欲乘流下石頭起來茫  
茫視八極萬里只有元丹邱丹邱子游人間風塵何爲往復還玉  
華山人近招我九日朝帝蒼梧山

賦伯玉透光鏡

麻九疇

太陰淪魄元不耀太陽分光成二曜嗚呼怪銅盜此幻透影在壁  
與背肖奩開燿燿光走庭劃如剗犀牛脫鞞泓澄秋落百丈潭疑  
有龍向天門跳秦娃漢婉化鴛土寵雨恩雲埋鳳詔當年椒塗鑑  
桃李身後泉臺映蓬藿枕簟無情草木香笙歌不暖梟狐嘯羈體



一醜不再妍不知持此將安照萬斛珠璣委備人喚得偷見成鬼  
剽借問金椎一控時何如海上青蠅弔壽如金石佳且好此銘此  
篆兩奇峭今誰子後曩誰先贏得紐樞經議竅萬古繁華一夢醒  
恍然入手稱神妙丹砂口紫翠羽青萬金難買人年少君侯新自  
洛陽來玉臺人物今温嶠相看大笑古人癡收鏡入奩還自笑

竹慶冠爲李道士賦

麻九疇

東方有物字豐隆以鳴爲職驅羣聾萬頭濺濺囚凍窟欲出不出  
愁天公迴寒作暖出一噫黑帝不敢藏昆蟲所以獨爲六子長揮  
斥元氣周神功車轟鼓震頃萬里六甲風雲隨喚起四陰用事合  
收聲猶奮狂陽鳴不已號令非時遭物玩草木不彫花再蕾惱得  
司秋訴帝閭漏泄機緘法當死天公大怪下桎梏推落車中墮巖  
谷非程非馬亦非人化作蒼篔一枝竹勁氣剛風難遽銷夜聞風  
雨猶蕭蕭聳身直上三千尺天公又怪干雲霄鬼壓神縛不聽出  
只見白雲鎖三日雲散惟餘青屈盤頤隱於臍變仙質道人真是

萬物盜斫取爲冠就天巧秋霜爭取上頭顱常與春風同醉倒此  
冠固奇惜未大有冠獨在方之外日月爲藤織四時烟霞爲樺綿  
千載天潢絕漢梁虛碧北斗旋衡簪沆漑不隨脂粉侶後貌不逐  
風霜陪獬豸一任旋乾復轉坤頭上峩峩終古在欲作檀那施此  
冠不識先生若爲戴

夏日

麻九疇

亭柯碧合龍蛇影睡起輓轡鳴曉井一簾曉雨捲不晴槐花滿地  
黃金冷屈指西風又到門相思團扇欲生塵何時萬戶垂楊裏高  
楫金鞭逢故人

跋伯玉命簡之臨米元章楚山圖

麻九疇

巴東峽壁如駮霞天鑿荆門當虎牙下有奔湍沈碧沙直衝北固  
如投家雲煙昏曉互明滅朝看沃日莫吞月遠山如指近如拳過  
客那知空一瞥高人廬此恨來晚不厭孤篷疊往返莫言造物好  
窮人許大乾坤富君眼以心爲鏡照諸山山如人面紛殊顏扁舟



日日青山上青山卻在滄波間人道癡兒固貪取我怪高人亦如  
許已將胸次祗長江更把毫端扛巨楚薺列楓林葉浮舸巧促魁  
梧入么麼丈尋收拾無邊春千里游遨坐中我自此頭吳尾甌越  
蠻煙五月髡人髮江山多處乃爾毒始信中原天下甲楚山可覽  
不可上水氣昏昏且多恙畫山縱不到真山有楚之峰無楚瘴靜  
明居士見山饑想在庵中得飽參戲呼老李臨君畫已坐君貪我  
更貪

長門怨

杜仁傑

天上神仙也別離人間那得鎮相隨不須貴買臨邛賦只想君王  
未見時

長安行

李獻甫

長安道無人行黃塵不起生榛荆高山有峰不復險大河有浪亦  
已平向來百二秦之形祗今百二秦之名我聞人固物乃固人不  
爲力物乃傾將軍誓守不誓戰戰士避死不避生殺人飽厭敵自

去長安有道誰當行黃塵漫漫愁煞人但見蔽野雞羣鳴河東獅  
子淚如雨眼花落日迷秦城長安道無人行長安城中若爲情

秋風怨

李獻甫

疏星耿耿明天河夜涼翠幕生微波碧梧委葉傳天井一夕秋風  
將奈何春風令人和秋風感人悲妾愁自與秋風期秋風爭管人  
別離燈炮垂紅粉泥暗龜甲屏風雲影亂絡緯弔月啼不斷蓮漏  
壓荷夜未半涼飈蕭蕭入疏竹枕底寒聲碎瓊玉敲愁撼睡睡不  
明花露盈盈泣魚目秋風且莫吹念妾守空閨嫁狗隨走雞隨飛  
九死莫作蕩子妻郎薄倖妾薄命花自無言絮無定碧雲莫合郎  
未歸幾度妝成掩明鏡



金文雅卷三

金文雅卷四目錄

詔令冊文

次奉聖州詔 金史

答高麗恭孝王上表稱臣詔 高麗史

勸農詔 金史

諭河北人民詔 金史

更定官制詔 松漠紀聞

親祀南郊詔 金史

諭皇太子詔 金史

諭宰臣詔 金史

恤民詔 金史

賜克王永成詔 金史

鄭王允蹈伏誅告中外詔 大金國志

諭陝西東西兩路行省詔 趙秉文行

金太祖

金太宗

金太宗

金太宗

金熙宗

金世宗

金世宗

金世宗

金世宗

金章宗

金章宗

金章宗



參知政事李蹊授左丞誥 趙秉文行

討宋韓侂胄詔 四朝聞見錄

答夏國告和書 趙秉文行 金章宗

擬元稹長慶新體誠諭 趙秉文

上太祖諡號冊文 大金集禮 金太宗

上太宗諡號冊文 大金集禮 金熙宗

立楚王為皇太子冊文 大金集禮 金世宗

立原王為皇太孫冊文 大金集禮 金世宗

上熙宗尊號冊文 大金集禮 完顏宗幹

上世宗尊號冊文 大金集禮 紇石烈良弼

封高麗王諡冊文 趙秉文行 金章宗

金文雅卷四

秀水莊仲方編

詔誥諭書冊文

次奉聖州詔 天輔六年

金太祖

朕屢敕將臣安輯懷附無或侵擾然愚民無知尚多逃匿山林即欲加兵深所不忍今其逃散人民罪無輕重咸與矜免有能率眾歸附者授之世官或奴婢先其主降並釋為良其布告之使諭朕意

答高麗恭孝王詔 天會四年

金太宗

省所上表稱臣并進奉土宜匹物等事具悉朕以推亡固存實帝王之道以小事大乃社稷之圖翳魁偉之巨材蘊變通之遠業卿家傳王爵世享祚封抗章竭尊獎之誠任土盡委輸之節仍稱卑號益見全能加非兵革之威誘不玉帛之惠自然來者不日良哉且君父之心予已堅篤而臣子之義汝毋易忘卜世卜年是彝是



訓外有合行條件事等卽次發使前去宣諭

勸農詔 天會四年

金太宗

朕惟國家四境雖遠而兵革未息田野雖廣而畝畝未闢百工略備而祿秩未均方貢僅修而賓館未贍是皆出乎民力苟不務本業而抑游手欲上下皆足其可得乎其令所在長吏敦勸農功

諭河北人民詔 天會五年

金太宗

自河之北今旣分畫重念其民或見城邑有被殘者不無疑懼遂命堅守若卽討伐生靈可愍其申諭以理招輯安全之儻執不移自當致討若諸軍敢利於俘掠輒肆蕩毀者底于罰

更定官制詔 天眷二年

金熙宗

皇祖有訓非繼體者所敢忘聖人無心每立事于不得已朕丕承洪緒一紀于茲祇適先猷百爲不越故在朝廷之上其猶草昧之初比以大臣力陳懇奏謂綱紀之未舉在國家之何觀且名可言而言可行所由集事蓋變則通而通則久故曰裕民宜法古官以

開政府正號以責實效著儀而辨等威天有雷風辭命安得不作人皆顏閔印符然後可捐凡此數條皆今急務禮樂之備源流在茲期以必行斷宜有定仰維先帝亦鑒微衷神豈可誣方在天而對越時由偶異若易地則皆然是用載維殆非相反何必改作蓋嘗三復于斯言皆曰可行庶將一變而至道乃從所議用創新規維茲故土之風頗尚先民之質性放于習遽易爲難政有所因故宜仍舊漸期胥效翕致大同凡在遐邇當體朕意其所改創事件宜令尙書省就便從宜施行

親祀南郊詔 大定十一年

金世宗

國莫大于祀祀莫大于天振古所行舊章咸在仰惟太祖之基命紹我本朝之燕謀奄有萬邦于今五紀因時制作雖增飾于國容推本奉承猶未遑于郊見況天休滋至而年穀屢豐敢不敷繹曠文明昭大報取陽升之至日將親饗于圓壇嘉與臣工共圖熙事以今年十一月十七日有事于南郊咨爾有司各揚乃職相子肆



祀罔或不欽

諭皇太子詔 大定十一年

金世宗

吾兒在儲貳之位朕為汝措天下當無復有經營之事汝惟無忘祖宗純厚之風以勤修道德為孝明信賞罰為治而已昔唐太宗謂其子高宗曰吾伐高麗不克終汝可繼之如此之事朕不以遺汝如遼之海濱王以國人愛其子嫉而殺之此何理也子為眾愛愈為美事所為若此安有亡唐太宗有道之君而謂其子高宗曰爾于李勣無恩今以事出之我死宜即授以僕射彼必致死力矣君人者焉用偽為受恩于父安有忘報于子者乎朕御臣下惟以誠實耳

諭宰臣詔

金世宗

近觀上封章者殊無大利害且古之諫者既忠于國亦以求名今之諫者為利而已如戶部尚書曹望之濟南尹梁肅皆上書言事蓋覬覦執政耳其于國政竟何所補達官如此況餘人乎昔海陵

南伐太醫使祁宰極諫至戮于市此本朝以來一人而已

恤民詔

大定二十二年

金世宗

皇祖有訓非繼體敢忘聖人無心惟百姓是念朕不承洪緒二紀于茲祇適先猷百為不遠永言治理務在卹民萬方有罪罪在朕躬所以當饋興憂夕惕載懷者也今天下粗安海內無事可使人分巡風俗申達冤枉孝悌力田給以優復鰥寡孤獨時加賑濟其有蠹民害政之事一切罷行

賜堯王永成詔

明昌二年

金章宗

卿親實肺腑夙著忠純侍顯考于春宮曲盡友于之愛洎冲人之繼統愈明忠赤之心艱難之中多所裨益朕心簡在毫楮莫窮用是起之苦塊之中授以維城之任自典藩服歲月荐更蕞爾趙邦知驥足之難展眇哉鎮府固牛刀之莫施方思驛召以赴朝何意遽罹于國憲偶因時獵頗擾部民法所不寬憲臺聞上朕尚舍容累月未忍即行雖欲遂于私恩竟莫違于公議解卿前職即乃世



封噫祖宗立法非一人之敢私骨月至親豈千里而能間以此退閑之小誠欲成終始之鴻恩經云在上不驕高而不危是以知節慎者修身之本驕矜者敗德之源朕每自勵今以戒卿昔東平樂善能成不朽之名梁孝奢淫卒致憂疑之悔前人所行可為龜鑑卿兼資文武多藝多才履道而行何施不可如能德業日新無慮牽復之晚朕素不工詞翰臨文章草直寫所懷莫不以辭害意也

鄭王允蹈伏誅告中外詔

明昌四年

金章宗

天下一家詎可窺于神器公族三省卒莫遁于常刑非忘本根骨肉之情蓋為宗社安危之計亦由涼德有失睦親乃于間歲之中連致逆謀之起恩以義揜至于重典之亟行天高聽卑殆非此心之得已興言及此惋歎奚窮

諭陝西東西兩路行省詔

趙秉文行

金章宗

比以北境稱兵西都為重肆遣將帥以衛封陲仍申命于大臣以分領于行省其責不為不重其任不為不優如聞彼軍深入夏境

倘邊方之少警將內地之可憂雖九廟扶持素為神明祚也而一時利害不為社稷計乎若非叶力以早圖恐或噬臍之不及其體此意以究爾圖於戲進退軍之密謀朕不從中制也安危國之大計卿其以身任之可守可攻各度其勢或犄或角一從所長其毋失事機以勉圖成效

參知政事李蹊授左丞詔

趙秉文行

金章宗

君不借才于異代所資者當世之賢豪天將降任于是人必付以大賢之事業朕以寡昧獲紹基圖念祖宗開創之艱思社稷久長之計而四郊多壘羣生未寧提封未入于版圖陵寢尙霑于霜露中夜以歎茲心靡遑期得英偉絕俗之才以濟險阻非常之運疇若予采今得其人具位李蹊器識邁倫才猷經世以大雅飭吏事以術業贊廟謀比長外臺薛宣之政事已試召還中省張鎬之籌策甚良是用貳我機衡進之丞轄於戲承平之世中庸談笑而有餘多難之時賢哲馳騫而不足身濟大業力恢中原幸得遭時其



任以天下之重毋以有已或負于人主之知勉盡乃心以稱朕意

可改授尚書左丞兼修國史加上柱國餘如故

金章宗

討宋韓侂胄詔

泰和六年

蠢爾殘昏巨迷 輒鼓兵端首開邊隙敗三朝七十年之盟好

驅兩國百萬眾之生靈彼既逆謀此宜順動尙期決戰同享昇平

金宣宗

答夏國告和書

趙秉文行

以生民爲心不以細故而忽生民之命以天下爲度不以私忿而傷天下之功惟我國家奄宅中外威制萬里恩結三方高麗叛歸卻而不受孽宋既服免其稱臣苟可利于生靈有不較其名分矧惟大夏特我寶鄰盟誓既百年于茲恩好若一家之舊乃者北兵之大擾因而東道之不通豈意同盟墮此奸計俾我兩朝之交質至于一矢之相加幸上天開悔禍之期使赤子有息肩之望茲紆信使特枉載書忍以一朝之違遽忘累世之好矧此輔車之勢屬我唇齒之邦與其厭外夷之陸梁孰若結諸夏之親昵維茲不類

乃我同仇當人心厭亂之秋見天道好還之意眾既烏合罪復貫盈彼物極則終衰此數離而復合且闔牆猶可禦侮況同舟何患異心既有成言當如來約

擬元稹長慶新體戒諭

趙秉文

予新卽大政承元和師旅之後軍國庶務有所未明尙賴股肱元輔文武庶僚同寅戮力叶贊太平之功如聞有司罔克勸相翫歲愒日習以成風因循者首歲月以養資罷懦者託疾病以廢庶爾旣若此予何賴焉爾尙明時子言用孚汝聽掌刑者無以私情破公法俾有冤抑之情典選者無以小節妨大務俾有留滯之歎掌計者出納之吝固防濫予取不以道亦傷吾民無縱陪克俾有流離之嗟曰諫官御史惟汝耳目其有大利害具以聞無毛舉細事以塞責曰守令兵役之後吾民甚苦無怠撫養無爲蝨賊曰採訪使敦本察吏是汝之責汝其察吏治以催科爲名肆侵漁者曰將帥汝典戎律勗爾偏裨倣爾師徒殄殲乃仇以復我高祖文王之



境土爰暨將校汝皆功臣之後無忝爾祖考其尙蹈果毅無敢冒  
我糗糧無私役爾卒伍無與親民之官妄分彼此且我烈祖暨乃  
祖乃父胥及逸勤勳在王府以有此境土共享太平之福相在小  
民尙不忘累聖涵養之恩況我有官君子世受厚恩身被厚祿營  
己自私獨不爲朝廷惜乎嗚呼厥亦惟我憲考賞明罰公眾職修  
理成法具在我其敢弗率爾尙一乃心敬乃事厥有成績朕不汝  
吝其或弗欽邦有常刑朕不庸釋治業赴功可不勉歟

上太祖諡號冊文

天會三年

金太宗

孝弟嗣皇帝臣諱謹再拜稽首上言曰蓋聞創丕基樹鉅本將慶  
流于萬世者先王啓後之功揚鴻懿薦大明使輝映于百王者後  
世奉先之道實始終之鉅美抑今古之通行者也伏惟兄大聖皇  
帝應輝魄之元符握榮河之秘紀三靈協贊千載勃興居多淵靜  
之謀動合變通之理御家以儉遵夏禹之卑宮刑國以輕體漢高  
之約法加以神襟豁達聖器英雄乘覆昏取亂之機奮濟世安民

之業周文已出知殷滅之有期唐祖旣生見隋亡之不遠頃者有  
遼訖運昏主承家狎侮太平荒迷多罪先絕鄰好曲造兵端旣誘  
納我叛亡又侵圖我邊鄙天實厭棄民日怨咨戚旣自貽禍將孰  
免繫天下起早覓之望我聖人行時雨之師親御六軍用申九伐  
人病大江之阻自得達通兵臨巨敵之來卜占瑞火故能一舉取  
遼霄再舉下雲燕何銳敢前無堅不破方當秦野肆步逐鹿之蹤  
俄值軒湖長往飛龍之駕眷惟天命有屬微躬弗遑康寧勉思述  
繼百神假手果拔怨叛之根四海驩心遂定神明之器蓋憑成算  
獲畢前功敢忘歸報之恩嚴奉追崇之號括地開封之謂武體乾  
啓祚之謂元合以爲名庶其稱德謹奉玉冊玉寶恭上尊號曰武  
元皇帝廟號太祖伏願耿光不泯與日月以俱垂休烈無窮將山  
河而共久格思神馭膺此縉儀尙期顧歆求有蒙賴

上太宗諡號冊文

天會十三年

金熙宗

維天會十三年歲次乙卯三月甲戌朔七日庚辰哀孫嗣皇帝臣



諱謹再拜頓首言曰伏以乾坤覆載之功非俄可度而俄可測耳  
目見聞之外或名曰夷而名曰希乃知妙出于器形尙有強加其  
稱謂故帝皇以降號諡攸存生以表其殊功歿則飾其大惠率由  
錫命于上帝將用式孚于後人非臣子之所得專在典章而不敢  
闕宜迹所行之大用光不朽之傳伏惟大行皇帝廣淵清明篤實  
純粹渾然德性而無所畛域發乎事業則休有烈光始乎太祖之  
濯征常以介弟而居守推恩撫眾而內益固本務穡節力而外無  
匱供好經遠猷克斷大事共能定天下之業豈特寬關中之憂兆  
姓與能百靈眷德位肆定于主器心常戢于在淵將嗣不圖猶云  
菲德推戴之始躬三讓而克誠臨御以來明兩作而善繼每念前  
人之圖事欲終下武之伐功于時民望尙殊邦統未一遼主之竄  
越也收合餘燼宋人之背誕也包藏禍心爰命進師密授成算奉  
天致討惟日奏功故纂服之後不數年其係組而來凡三帝萬里  
共貫六合一家曾無專享之私遂定久安之勢畫封守以正域選

賢能而爲邦物肅德威人服義舉處衽席無爲之逸鳩方冊不載  
之功必也聖乎其可知已若乃茂昭孝德夤奉先猷殆將一動而  
順稽非止三年而不改議有俯迫政或當更泣祖訓于手澤之餘  
下莫仰視畏神威于屋隅之近躬若無容繼述之間慎重如此其  
知人則哲乃任官惟賢慎簡親勳共位將相有大用之材使各盡  
於不賞之功無所疑實駕馭以知方故優游而成治至于敬宗立  
愛齒族居尊內外敦序而無間言飲食洽比而有餘惠禮貴情稱  
實嫌名浮不疑而物亦誠好靜而民自正無玉食自奉禹儉不過  
以茅茨是居唐風載郁好善言惡旨酒遠佞人放鄭聲道交萬物  
而用必以時法約三章而刑不留獄燕殿達窮民之苦上都禁末  
利之游疾苦周知澆競是息謂七德戢兵也切戒黷武謂八政先  
食也每親督農第知安民之難未嘗以位爲樂謙抑不德而德逾  
有淵默不言而言乃謹故協氣橫流大田屢稔瑞靡不至史無絕  
書殆莫得以殫論可概言其所覩金仙効像有素鵲之爲先國犬



觸邪豈神羊之待喉乃德之致非人所能執貺丕昭幽明胥悅巍  
乎蕩乎能事之斯畢猗歎那歎聖功之無加天下大安王位孔固  
是宜平格以得壽遠告彌留而弗與爰屬眇躬嗣膺大寶舍子不  
立莫窮爲度之宏於祖丕承方懼貽謀之忝熒疚如歎充窮靡違  
會同軌以來偕俟遣車之卽遠而有宗王元老儒學禮官討論墳  
典之中斷自羲軒而下揚摧大美發揮英聲道惟最高極萬物以  
無稱名將終易煥七世之可觀或髣髴其形容共擬議其崖略與  
定款郊之請以張對天之休謹遣攝太尉皇叔祖大司空昱奉玉  
冊玉寶上尊諡曰文烈皇帝廟號太宗伏惟昭格至靈俯歆徽號  
永錫介祉以綏後昆嗚呼哀哉臣謹言

立楚王爲皇太子冊文

大定八年

金世宗

維大定八年歲次戊子正月甲子朔十七日庚辰皇帝若曰自昔  
有天下之君必嚴于宗廟惟時主宗廟之器莫重乎元良朕丕荷  
燕謀中興桓撥惟休大厯用卜於無疆永言孝思敢忘于嗣服蓋

傳家而累世及始自夏商以來立嫡以正諸侯有若春秋之訓其  
承天序匪出朕私咨爾楚王其祥發中闡體鍾上嗣生而岐嶷學  
則緝熙爛然揭前星之明溫其涵少海之潤文武之藝卓爾良能  
仁孝之心充于固有職在于問安視膳未嘗不承順其謹古制有  
監國撫軍抑克堪負荷其任固足以增重邦家之本允協億兆之  
心涓茲令辰昭以備物今冊爾爲皇太子於戲象取明兩位爲國  
儲以恩則父子之倫以義則君臣之分義不可或闕臣於君則必  
以忠恩不可少忘子事父則莫如孝矧左右前後皆其正當尊所  
聞行所知惟出入起居罔不欽勿遊於佚淫於樂用光我祖宗之  
顯德以對茲典冊之閔休

立原王爲皇太孫冊文

大定二十六年

金世宗

皇帝若曰昔我太祖肇造鴻業撫有于多方肆予一人纂紹丕圖  
期傳于萬世頃豫建于元子用祇率于大猷而享年不遐閱日寢  
遠仰賴上穹之祐早開甲觀之祥念儲副之重難乎久虛顧名分



之嚴宜以時定載稽故事備有前聞謂尊嫡者議著于漢儒曰立  
孫者經明乎周禮先王彝典朕曷敢廢天下公義朕曷敢違咨爾  
皇孫某官慶襲靈源系承正統英姿秀發德器早成動循謹厚之  
風居遠華腴之習諸難歷試眾譽翁歸初尹正于京畿旋登庸于  
揆路勤勞庶務兢畏一心固足以貳宸極之尊協重離之吉式涓  
穀且誕舉徽章粵從朱邸之華嗣陟青宮之邃今冊命爾為皇太  
孫於戲國本甚大也居之不可不敬廟邕至重也奉之不可不嚴  
篤愛親之心在斯須不離乎孝盡事君之道惟造次毋忘于忠爾  
能章不已之令名我亦有無疆之善慶豈不偉歟其勗之哉祇若  
朕命

上熙宗尊號冊文 皇統元年

完顏宗幹

皇統肇開犧燧因功而紀號帝圖傳序勳華象德以著稱率皆應  
億姓之樂推所以對三靈之眷顧自時厥後何莫由斯國家千載  
膺期弈世修德重光積慶應歷統天恭惟皇帝陛下恭承垂裕之

休保有無疆之祚表在躬之瑞旋九宮而乾數周當出震之初闢  
羣氛而義馭朗煥八彩重瞳之質宅九州四海之尊方其恭默不  
言淵沈自保固已照羣臣之邪正洞庶政之後先既而雷動風飛  
乾旋坤闔威柄一而姦朋懷懼仁言播而遠近歸心至于博探庭  
謨奮張王旅必待有名而後應固非得已而亟行是以戈鋌所臨  
金湯失險攻堅易于振槁傳令速于置郵仍以暇時舉修墜典斟酌  
律禮糠粃漢唐損益質文規模虞夏隆功並建振古罕倫然猶  
體貌耆英惇敘宗族約已而厚祿秩之賜虛心以來啟沃之言府  
庫不積而均力于農疇聲色不邇而留神于古訓服御靡崇于雕  
飾宮室聊給于會朝田獵習武事而已亦踰月而不行宴樂給賓  
享而已葢非時而不召歷觀前代皆有強鄰各專社稷版圖互稱  
命令制誥今則日月所燭正朔無殊並開有指之土疆盡抗至尊  
之名號加之璇璣正協玉燭時和連珠合璧之祥居鄰日告千倉  
萬箱之積比屋歲滋謠頌浹于康衢珍貴來于絕域乃者別京望



幸鑾輅省方屬燕薊之多風積陰霾而浹日及茲動軫寂不揚塵  
天地清明人神慶悅是以羣工卿尹四海耄倪竝造明庭交修封  
奏敢敘陳于懿美顧深抑于謙冲謂寅畏時恭聰明時憲崇天之  
實也虛靜恬淡慈儉為寶體道之驗也視聽言動復于禮緝熙光  
明與于學茲謂欽以直已是非可否究其實幽深遠近得其情茲  
謂明以察微經緯有方煥乎丕顯之文威懷兼示赫爾布昭之武  
固天縱之將聖而多能非學惟民歸于一德而主善為師咸五登  
三豈形容之可及挂一漏萬慚鋪敘之非工臣等不勝大願謹奉  
玉冊玉寶上尊號曰崇天體道欽明文武聖德皇帝

上世宗尊號冊文

大定七年

紇石烈良弼

形而上者謂之道道之用出于自然物之祖者本乎天天之功歸  
于不宰然而尊居四大茂育羣生觀妙有而曰希夷擬形容而稱  
尊矣惟聖運化體道與天強為之名蓋功德所立者卓對揚其美  
繫臣庶不謀而同雖繇謙讓以未遑其如樂推而不厭建久安成

長治況屬今休騰茂實蜚英聲茲為壯觀恭惟云云剛健中正緝  
熙光明惟簡在于帝心實矜從于民欲顯膺推戴非以力求大獲  
纂承其惟自度修德之符歟見亦應誠之瑞畢臻六氣和而五穀  
登羣生遂而萬民殖斯可謂之應天自頃禍亂實開聖明拯生靈  
於臨危安基祚於隍杌宗祏有主人謀與能仗大順而揮天戈征  
不庭而定王國北陲孽寇授首于勢窮南服遠人尋盟于事追拓  
統無外迓衡弗迷大烈休光丕靈承于祖考璇圖寶曆永孚休于  
邦家斯可謂之興祚兼愛無私博施濟眾下卹刑之詔靡冤不申  
定寢兵之功惟暴是禁續功臣之世而延其賞去貪人之類而表  
其廉非至仁孰能與于此為政則如北辰恭已而正南面味爽不  
顯輝光日新宜民宜人克君克長終始惟一茲尙監于湯銘威懷  
所加肆昭升于禹迹非至德孰能與于此道濟天下識居物先極  
深研幾通志成務斯可謂之聖宗祏合享祇事惟寅陵寢蠲烝追  
懷罔極嗣有令緒能昭先功睦親族而和萬邦通神明而光四海



斯可謂之孝未膺顯冊終鬱輿情固拒誠難俞音始下臣等管窺  
蠡測雖莫際于高深玉振金聲敢奉揚于典禮臣等不勝大願謹  
奉玉冊玉寶上尊號曰應天興祚仁德聖孝皇帝

封高麗王諡冊文

趙秉文

皇帝若曰分封樹屏實賴幹臣繼世象賢以崇有德率由彝憲懋  
明至公惟我祖宗經略區夏亦大啓于土宇用綏懷於遠人朕若  
昔大猷紹休先緒乃眷東土惟我世臣宜加錫命之榮庸展幹方  
之寵咨爾起復知高麗王國事王諡受材明敏賦性中庸有肅恪  
以提身資忠信以行道惟乃先世荒於東陲象輅介圭啟封圻於  
大國彤弓錫盾作藩屏于王朝踐修厥猷不顯亦世亦暨汝父克  
成厥終肇敏戎功嘉召公之是似女有良翰命申伯以于宣是用  
畀爾菁茅纘我祖考以永爲我蕃輔用追配于前人嗚呼惟有德  
可以和人民惟謹度可以保富貴罔曰弗克惟既厥心罔曰孔艱  
惟敬厥事慎乃服命律乃有民往盡乃心典聽朕命




金文雅卷四

金文雅卷四

二





一都四冊